

12/2002 Legea, maiatzaren 23koa, Euskal Autonomia Erkidegoarekiko Ekonomi Ituna onetsi duena (EAO Maiatzaren 24koa)

JUAN CARLOS I.a

ESPAINIAKO ERREGEA

Honako hau ikusi eta ulertzen duten guztiei.

Jakin ezazue: Gorte Nagusiek lege hau onetsi dute eta nik berretsi egin dut.

ZIOEN AZALPENA

Ekonomi Itunaren marko juridiko-positiboaren oinarria Konstituzioaren lehen xedapen erantsian dago; honen bitartez Konstituzioak babesa eta begirunea eskaini dizkie foru lurraldeen eskubide historikoei, eta foru araubidea, oro har, aldiro eguneratu dadila agindu du, Konstituzioaren beraren eta Autonomia Estatutuaren esparruan eguneratu ere.

Konstituzioaren agindua betez, eremu horretako abiaburu nagusia ezarri zuen Euskadiko Autonomia Estatutuak, abenduaren 18ko 3/1979 Lege Organikoaren bidez onetsiak. Euskadiko lurralde historikoetako erakunde eskudunek, abiaburu horretatik, bakoitzak bere zerga-sistema ezarri, zaindu eta araupetu ahal dute.

Foru erakundeek zerga gaitan duten ahalmena Euskadiko berezitasunaren osagai material gisa gauzatu ahal dadin, ordea, behar bezala antolatu behar dira Estatuaren eta Euskadiren arteko finantza eta zerga harremanak. Arestian aipatutako Autonomia Estatutuak helburu horrekin xedatu zuenez, harremanok tradiziozko foru sistemaren bitartez araupetu behar dira, ekonomi itunaren edo hitzarmenen bitartez, hain zuzen ere. Horren ondorioz, jakina, bi administrazioen artean finantza-fluxuak gertatzen dira eta halakoak jaso egin behar dira ekonomi itunean.

Hala, bada, maiatzaren 13ko 12/1981 Legeak Euskal Autonomia Erkidegoarekiko lehenengo Ekonomi Ituna onetsi zuen, eta iraunaldi mugatua ezarri zion, bi mila eta batgarren urteko abenduaren hogeita hamaika artekoa, Arabako probintziarekiko Itunari ezarri zitzaion bezala, Arabakoa hartu baitzen oinarri Euskadikoa egiteko.

Euskal Autonomia Erkidegoarekiko Ekonomi Itun berriak, honako lege honen bidez onetsitakoak alegia, 1981eko Itunaren abiaburu, oinarri eta zuzentarau bereberei eutsi die, azken hogeitazko esperientzia kontuan izanik. Alabaina, sendotu egin dira itunaren aplikazioari begira segurtasun juridikoa areagotzeko bideak eta prozedurak.

Beste alde batetik, Ekonomi Itun berriari izaera mugagabea eman zaio, Konstituzioaren eta Autonomia Estatutuaren babesean irautea ziurtatuko dion esparru egonkorrean egokitu dadin. Hala ere, zerga-sisteman gerta litezkeen aldakuntzei egokitzeko bideak eman zaizkio.

Hori guztia dela-eta, bi administrazioek, elkar hartuta eta Euskal Autonomia Erkidegoarekiko lehenengo Ekonomi Ituna onesteko erabili zen prozedura bera erabilia, honako hau ezarri dute, eta Kuporako Batzorde Mistoak behar den erabakia onetsi du 2002ko martxoaren 6an.

Artikulu bakarra.

Euskal Autonomia Erkidegoarekiko Ekonomi Ituna onetsi da, Euskadiko Autonomia Estatutuari buruzko abenduaren 18ko 3/1979 Lege Organikoaren berrogeita batgarren artikuluan aipatutako ituna, hain zuzen ere. Itunaren nondik-norakoak lege honen eranskinean daude.

XEDAPEN GEHIGARRI

Bakarra.

Abenduaren 12ko 18/2001 Legeak, Aurrekontu Egonkortasunari buruzko Lege Orokorrak, azken xedapenetatik bosgarrenaren 2. idatz-zatian dioena aldatu egin da eta honela geratu da:

«Lege honetan xedatutakoa Euskal Autonomia Erkidegoari aplikatzeak, horren foru araubidea dela-eta, ez dio kalterik egingo Ekonomi Itunari buruzko Legean xedatutakoari.»

XEDAPEN INDARGABETZAILE

Bakarra.

Lege hau indarrean jartzen denean indarrik gabe geratuko dira harekin bat ez datozen xedapenak, haren maila berekoak edo beheragokoak izanez gero.

AZKEN XEDAPEN

Bakarra.

Lege honek Estatuko Aldizkari Ofizialean argitaratzen den egunaren biharamunetik aurrera izango du indarra, baina ondoreak bi mila eta biko urtarrilaren batetik aurrera izango ditu.

Beraz, Espainiar guztiei, norbanako nahiz agintari, honako legea betetzeko eta betearazteko agintzen diet.

ERANSKINA

EKONOMI ITUNA

LEHEN KAPITULUA ZERGAK

1.ATALA ARAU OROKORRAK

1. artikulua. Lurralde historikoetako erakundeen eskumenak.

Bat. Lurralde historikoetako erakunde eskudunek, bakoitzak bere lurraldean, tributu-araubidea mantendu, ezarri eta arautzeko ahalmena izango dute.

Bi. Lurralde historikoetako tributu-sistema osatzen duten tributuak ordainaraztea, kudeatzea, likidatzea, ikuskatzea, berrikustea eta biltzea foru-aldundiei dagokie, bakoitzari bereak.

Hiru. Lurralde historikoetan itundutako tributuak kudeatu, ikuskatu, berrikusi eta biltzeko eskumena duten erakundeek Estatuko Ogasun Publikoak dituen ahalmen eta eskubide berak izango dituzte.

2. artikulua. Printzipio nagusiak.

Bat. Lurralde historikoek zerga-sistematik ezarriko badute, sistema horietan honako printzipio hauek bete beharko dira:

Lehenengo. Elkartasunari begirunea zor zaio, Konstituzioan eta Autonomia Estatutuan zehaztutako moduan.

Bigarren. Estatuko zergen egitura orokorra kontuan izan behar da.

Hirugarren. Estatuarekiko koordinazioa, zerga-sistemen harmonizazioa eta lankidetzaren sustatu behar dira, ekonomi itun honetako arauak betez.

Laugarren. Lurralde historikoetako erakundearen arteko koordinazioa, zerga-sistemen harmonizazioa eta elkarrekiko laguntza, Eusko Legebiltzarrak helburu horiek betetze aldera ematen dituen arauak betez.

Bostgarren. Estatu espainiarrak izenpetuta eta berretsita dituen nazioarteko itun edo hitzarmenen menpe egongo dira lurralde historikoak, eta gauza bera gertatuko da gerora beste halakoren bati atxikitzen bazaio.

Bereziki, lurralde historikoetako zerga-sistemak bat etorri behar du zergapetze bikoitza ekidite aldera Espainiak sinatuak dituen nazioarteko hitzarmenetan eta Europar Batasunak zerga-harmonizazioari buruz emandako arauetan xedatutakoarekin, eta halako hitzarmen eta arauak aplikatzearen ondorioz itzulketak egitea onartu behar du, bidezkoa denean.

Bi. Zergei buruzko Lege Orokorrean zerga-arauak ulertzeko ezarritakoaren bidetik ulertu behar dira ekonomi itun honetako arauak.

3. artikulua. Zergak harmonizatzea.

Zerga-arauak sortzeko orduan, lurralde historikoek:

- a) Terminologia eta kontzeptuak Zergei buruzko Lege Orokorrearen arabera egokitu behar dituzte, ekonomi itun honetan ezarritako berezitasunak kontuan hartu behar badira ere.
- b) Benetako zerga-presio orokorra Estatuko gainerako lekuetan dagoenaren parean mantendu behar dute.
- c) Espainia osoan zehar mugitzeko eta edonon geratzeko askatasuna errespetatu eta bermatu egin behar dute, bai pertsonen kasuan, bai -mugitzeko askatasuna dela eta- ondasun, kapital eta zerbitzuen kasuan ere. Ezin da, beraz, bazterketarik gertatu; ezin dira enpresen lehiazeko aukerak murriztu; eta ezin da baliabideen asignazioan distortsiorik eragin.
- d) Jardueren sailkapenak direla-eta, abeltzaintza, meatzaritza, industria, merkataritza, zerbitzu, lanbide eta arte arloetan, lurralde erkidean erabiltzen den sailkapen berbera erabiliko dute, nahiz eta sailkapen zehatzagoa egiteko aukera eduki.

4. artikulua. Lankidetzaren printzipioa.

Bat. Lurralde historikoetako erakunde eskudunek Estatuko Administrazioari jakinaraziko dizkiete zergen arloko arauak egiteko proiektuak, xedapenok indarrean jarri baino nahikoa denbora lehenago.

Estatuko Administrazioak jakinarazpen berbera egin behar die lurralde historikoetako erakundeak.

Bi. Nazioarteko akordioek ekonomi itun hau betetzeko orduan inolako eraginik baldin badute, akordio horietan Euskadiko erakundearen lankidetzaren ahalbidetzeko behar diren baliabideak jarriko ditu Estatuak.

Hiru. Estatuak eta lurralde historikoek, zergak kudeatu, ikuskatu eta biltze aldera eskumenez dagozkien zereginak betetzen dituzten bitartean, zerga horiek hobeto ordainarazteko beharrezkoak zaizkien datu eta aurrekari guztiak emango dizkiote elkarri, behar diren garaian eta eran. Hain justu, administrazio batak eta besteak:

- a) Beharrezkoa duten informazio guztia emango diote elkarri, datuak prozesatzeko zentroen bitartez. Horretarako, behar den komunikazio teknikoak abiaraziko dute.

Urtero, zerga-mailako informatika-plan koordinatua egingo dute elkarrekin.

- b) Ikuskaritza-zerbitzuek hainbat plan egingo dute, helburu, arlo eta hautaketa-jardunbide koordinatu jakin batzuk batera ikuskatzeko. Gauza bera egingo dute, gainera, egoitza aldatu duten zergadunekin, zerga-gardentasunaren araubidepeko erakundeekin eta zergak Sozietateen gaineko Zergan ageri den eragiketa-kopuruaren arabera ordaindu behar dituzten sozietateekin.

Lau. Estatuak eta Euskal Herriko erakundeek erabakiko dituzte informazioa trukatzeko prozedurak; prozedura horiek honako hauek egoki betetzen direla bermatuko dute: Estatuaren nazioarteko itun eta hitzarmenak, eta bereziki Europar Batasunetik datorkigun araudia, kooperazio administratiboari buruzkoa eta elkarri laguntzearen ingurukoa.

5. artikulua. Estatuarenak bakarrik diren eskumenak.

Honako eskumen hauek estatuarenak bakarrik dira:

Lehenengo. Zerga Berezien eta Balio Erantsiaren gaineko Zergaren barruan, inportatzeko eskubideak eta inportazio-kargak arautzea, kudeatzea, ikuskatzea, berraztertzea eta biltzea.

Bigarren. Ekonomi itun hau betetzen den begiratzea, goi-mailako ikuskaritza eginda. Horretarako, eginkizun hori duten Estatuko organoek, urtero, betebeharrak horren emaitzak azaltzeko txosten bat egin behar dute, Eusko Jaurlaritzaren eta foru aldundien laguntzarekin.

2. ATALA PERTSONA FISIKOEN ERRENTAREN GAINEKO ZERGA

6. artikulua. Aplikatu beharreko arauak eta Zergaren ordainarazpena.

Bat. Pertsona Fisikoen Errentaren gaineko Zerga itundutako zerga da eta araudi autonomoari lotuta dago. Lurraldearen arabera, eskumena daukan foru aldundiari dagokio zerga hori ordainaraztea, baldin eta subjektu pasiboaren ohiko bizilekua Euskadin badago.

Bi. Familia-unitate bereko subjektu pasiboek ohiko bizilekua lurralde desberdinetan baldin badaukate eta zergak batera ordaintzea erabakitzen badute, likidazio-oinarri handiena duen kideak ohiko bizilekua duen lurraldeko Administrazioak izango du eskumena; likidazio-oinarria kasuan kasuko lurraldeko arauari jarrituz kalkulatu da.

7. artikulua. Lan-etekinak direla-eta egindako atxikpenak eta konturako sarrerak.

Bat. Lan-etekin ziozko atxikpenak eta konturako sarrerak, honako kasu hauetan, lurraldea dela-eta eskumena daukan foru-aldundiak eskatuko ditu, bere araudiari eutsiz:

- a) Euskadin egindako lan edo zerbitzuetatik datozen etekinak.

Lanak edo zerbitzuak lurralde erkidean eta Euskadiko lurraldean egiten direnean, edo zer tokitan egin diren zehazterik ez dagoenean, uste izango da langilea adskribatuta dagoen lantokia kokatzen den lurraldean egin direla.

Telelanaren kasuan ere, eta lanak edo zerbitzuak atzerrian egiten direnean, edo ontzi handietan, itsasontzi txikietan, itsas artefaktuetan edo itsasoko plataforma finkoetan, uste izango da langilea adskribatuta dagoen lantokia kokatzen den lurraldean egin direla.

- b) Gizarte Segurantzaren eta Klase Pasiboaren araubide publikoetatik hartzen diren pentsioen, hartzeko pasiboaren eta prestazioen etekinak, Enpleguaren Nazio Erakundetik, montepio eta mutualitateetatik, enplegua sustatzeko funtsetatik, pentsio-planetatik eta borondatezko gizarte aurreikuspeneko erakundeetatik datozenak, eta enpresen eta beste erakunde batzuen prestazio pasiboak, baldin eta hartzailearen ohiko bizilekua Euskadin badago.

- c) Administrazio-kontseiluetako, horien ordezeko batzordeetako eta beste ordezkari-organoko batzuetako administratzaileen eta kideen ordainsariak, erakunde ordaintzailearen egoitza fiskala Euskadin baldin badago.

Estatuak eta foru-aldundiek eska dezaketen sozietateen gaineko zergaren subjektu pasibo diren erakunde kasuan, bi administrazioei dagokie atxikpenak egitea, bakoitzari bere lurraldean burututako eragiketen bolumenaren proportzioan. Horretarako, sozietateen gaineko zergarako azken aitorpen-likidazioan adierazitako proportzio bera aplikatuko da. Atxikpenok foru-arautegiarekin edo arautegi erkidearekin bat etorritik eskatuko dira, erakunde ordaintzaileari zein arautegi aplikatu behar zaion, sozietateen gaineko zergari buruzko foru-arautegia edo arautegi erkidea, horren arabera; era berean, irizpide beraren arabera eskumena daukan administrazio organoek egingo dute ikuskapena. Aurrekoa gorabehera, zerga ordainarazteko eskumena daukan administrazioak ezarriko ditu aitorpen-likidazioa aurkezteko lekuari, erari eta epeari buruzko arauak.

Bi. Aurreko apartatuan xedatutakoa hala izan arren, Estatuko Administrazioari dagozkio Estatuak bere funtzionarioei eta lan-kontratuz eta administrazio-kontratuz dituen enplegatuei emandako ordainsari aktiboei eta pasiboei buruzko atxikpenak; jasotzaileak barik beste pertsona batek sortutako pentsioak ere ordainsari horien artean sartzen dira.

Aurreko paragrafoan xedatutakoa ez zaie aplikatuko erakunde autonomoetako eta enpresa-erakunde publikoetako funtzionarioei eta langileei, ez eta Estatuko merkataritza-sozietateetako, Estatuan adskribatutako partzuergoetako, Estatuko fundazioetako, transferitu gabeko unibertsitate publikoetako eta Euskadiko lurraldean dauden portuetako agintarizetako.

8. artikulua. Konturako ordainketak ekonomi jardueren etekinen zioz.

Bat. Ekonomi jardueretatik datozen etekinen ziozko atxikpenak eta konturako sarrerak lurraldea dela-eta eskumena daukan foru aldundiak eskatuko ditu, atxikpena edo konturako sarrera derrigorrez egin behar duenak ohiko egoitza edo zerga-egoitza Euskadin badu. Estatuko Administrazioak eta foru aldundiek, betiere, bakoitzak berak ordaindutako etekinei dagozkien atxikpen eta konturako sarrerak eskatuko dituzte.

Atxikpen eta konturako sarrera horietan, lurralde erkidean aplikatzen dituzten tasa berberak aplikatuko dituzte foru aldundiek.

Bi. Pertsona Fisikoen Errentaren gaineko Zerga dela-eta konturako ordainketa zatikatuak egin behar direnean, lurraldearen arabera eskumena duen foru aldundiak eskatuko ditu, bere arautegiarekin bat etorritik, zergadunak ohiko egoitza Euskadin badu.

9. artikulua. Higigarrien kapitalaren etekinak direla-eta egindako atxikpenak eta konturako sarrerak.

Bat. Higigarrien kapitalaren etekinak direla-eta egin beharreko atxikpenak eta konturako sarrerak Estatuko Administrazioak edo foru-aldundi eskudunak eskatuko ditu, bakoitzak bere arautegia kontuan hartuta, honako arau hauen arabera:

Lehenengo. Lurraldea dela-eta eskumena duen foru-aldundiak honako hauek eskatuko ditu:

- a) Edozein erakunderen funts propioetan parte hartzeagatik lortutako etekinak, baita obligazio eta antzeko tituluetako interesak eta gainerako kontraprestazioak ere, etekin horiek ordaintzen dituzten erakundeek sozietateen gaineko zerga Euskadin bakarrik ordaintzen dutenean.

Estatuak eta Euskadiko foru-aldundiek eska dezaketen sozietateen gaineko zergaren subjektu pasiboen kasuan, bi administrazioei dagokie atxikpenak egitea, bakoitzari bere lurraldean burututako eragiketen bolumenaren proportzioan. Horretarako, sozietateen gaineko zergarako azken aitorpen-likidazioan adierazitako proportzio bera aplikatuko da. Atxikpenok foru-arautegiarekin edo arautegi

erkidearekin bat etorri eskatuko dira, erakunde ordaintzaileari zein arautegi aplikatu behar zaion, sozietateen gaineko zergari buruzko foru-arautekia edo arautegi erkidea, horren arabera; era berean, irizpide beraren arabera eskumena daukan administrazio organoek egingo dute ikuskapena. Aurrekoa gorabehera, zerga ordainarazteko eskumena daukan administrazioak ezarriko ditu aitortpen-likidazioa aurkezteko lekuari, erari eta epeari buruzko arauak.

- b) Autonomia Erkidegoak, foru-aldundiek, udalek eta Euskadiko lurralde-administrazioetako eta administrazio instituzionaleko beste erakundeek jaulkitako zor eta jesapenetako interes eta gainerako kontraprestazioak, edozein tokitan ordainduta ere. Estatuak eskatuko ditu, ordea, Estatuak berak, beste autonomia-erkidego batzuek, lurralde erkideko korporazioek eta Estatuak lurralde-administrazioetako eta administrazio instituzionaleko bestelako erakundeek egindako jaulkipenei dagozkienak, baita Euskadiko lurraldean ordaintzen badira ere.
- c) Banku, aurrezki-kutxa, kreditu-kooperatiba eta balio bereko erakundeetako eragiketa pasiboetako interesak eta gainerako kontraprestazioak, baita beste edozein kreditu-etxetan edo finantza-etxetan egindakoetatik lortutakoak ere, baldin eta etekinaren hartzaileak Euskadin badu ohiko bizilekua edo egoitza fiskala.
- d) Kapitalizazio-eragiketetatik eta bizitza- edo elbarritasun-aseguruen kontratuetatik lortutako etekinak, baldin eta horien onuradunak, edo aseguru-hartzaileak, erreskatearen kasuan, Euskadin badu ohiko bizilekua edo egoitza fiskala.
- e) Kapital-ezarpenetik datozen biziarteko errentak eta aldi baterako beste batzuk ere bai, onuradunak ohiko bizilekua edo egoitza fiskala Euskadin baldin badauka.
- f) Jabetza intelektualetik lortutako etekinak, subjektu pasiboa egilea ez bada, eta industria-jabetzatik eta laguntza teknikoa ematetik lortutakoak, ordaintzen dituen pertsonak edo erakundeak egoitza fiskala Euskadin baldin badauka.
- g) Ondasun, eskubide, negozio, meatze eta antzekoen errentamendutik datozenak, Euskadiko lurraldean kokatuta baldin badaude.

Bigarren. Higiezinak hipotekatuz bermatutako maileguen interesen kasuan, berme modura erabilitako ondasunak dauden lurraldeko administrazioak izango du atxikipena eskatzeko eskumena.

Hipotekatutako ondasunak lurralde erkidean eta Euskadiko lurraldean baldin badaude, bi administrazioei dagokie atxikipena eskatzea. Horretarako, interesak hainbanatu egingo dira hipotekatutako ondasunen balioaren proportzioan, berme-asignazio berezirik ez badago behinik behin. Halakorik badago, kopuru hori erabiliko da hainbanatzeko oinarri modura.

Hirugarren. Ondasun higigarrien gaineko hipoteka bidez edo eskualdaketarik gabeko bahien bidez bermatutako maileguetako interesen kasuan, bermea inskribatzeko hartutako lurraldeko administrazioak eskatuko du atxikipena.

Laugarren. Mailegu soilen interesen kasuan, salerosketan ordaintzekotan utzitako prezioen kasuan eta kapitalak inon sartzegatik lortutako beste etekin batzuen kasuan, establezimendua dagoen lurraldeko administrazioak, edo atxikipena egiteko betebeharra duen erakundeak edo pertsonak ohiko bizilekua edo egoitza fiskala duen lurraldeko administrazioak eskatuko du atxikipena.

Bi. Artikulu honetan aipatutako atxikipenak eta konturako sarrerak ordainarazteko, lurralde erkidean aplikatzen diren tasa berberak aplikatuko dituzte foru-aldundiek.

10. artikulua. Atxikipenak eta konturako sarrerak, zenbait ondare-irabaziren zioz.

Bat. Talde-inbertsioko erakundeen akzio eta partaidetzak eskualdatu edo itzultzen direnean lortzen diren ondare-irabaziei dagozkien atxikipenak, eta harpidetza-eskubideak eskualdatzen direnean lortzen direnei dagozkienak ere, akziodun edo partaidearen ohiko bizilekua edo egoitza fiskala lurralde erkidean edo Euskadiko lurraldean, non dagoen kontuan hartuta, Estatuko Administrazioak edo lurraldea dela-eta eskumena daukan foru-aldundiak eskatuko ditu, zeinek bere arautegia betez.

Bi. Loteria eta apustu jakin batzuen sarien gaineko karga bereziaren ondoriozko atxikipenak agindu ahalko ditu Estatuko Administrazioak edo foru-aldundi eskudunak, hartzailearen ohiko bizilekua edo egoitza fiskala lurralde erkidean edo Euskadiko lurraldean dagoen kontuan hartuta.

Aurreko paragrafoan aipatu ez diren joko, lehiaketa, zozketa edo ausazko konbinazioetan emandako sariak direla-eta egiten diren atxikipenak eta konturako sarrerak (sariok ondasun, ekoizkin edo zerbitzu jakinen eskaintza, sustapen edo salmentari lotuta egon zein ez) Estatuko Administrazioak edo lurraldea dela-eta eskumena daukan foru-aldundiak eskatuko ditu, sariak ordaindu behar dituenak ohiko bizilekua edo egoitza fiskala lurralde erkidean edo Euskadiko lurraldean duen, horren arabera.

Apartatu honetan aipatutako atxikipenak eta konturako sarrerak ordainarazteko, lurralde erkidean aplikatzen diren tasa berberak aplikatuko dituzte foru-aldundiek.

11. artikulua. Kontura egin beharreko beste ordainketa batzuk.

Bat. Ondasun higiezin errentamendutik eta azpierrementamendutik lortutako etekinengatik egin behar diren atxikipenak eta konturako sarrerak lurraldearen arabera eskumena daukan foru aldundiak eskatuko ditu, bere arautegia erabiliz, baldin eta atxikipena edo konturako sarrera egin behar duenak Euskadin badu ohiko egoitza edo zerga-egoitza.

Bi. Erakundeei ordaindutako kopuruen ziozko atxikipenak eta konturako sarrerak, errenten egozketaren araubidearen indarrez, Pertsona Fisikoen Errentaren gaineko Zerga ordaindu beharra duten zergadunei egotzi behar zaizkienean, lurraldearen arabera eskumena daukan foru aldundiak eskatuko ditu atxikipen eta sarrera horiek, bere arautegia erabiliz, baldin eta atxikipena edo konturako sarrera egin behar duenak Euskadin badu ohiko egoitza edo zerga-egoitza.

12. artikulua. Konturako sarreren eraginkortasuna-

Hartzailearen errentaren gaineko zerga likidatzeko orduan, lurralde batean zein bestean egin diren konturako sarrerek balioko dute. Baina horrek ez du esan nahi, ordainketa horiek behar ez den administrazioari eginda ere, beste administrazioak dagokion kopurua jasotzeko eskubidea galduko lukeenik; alderantziz, azken horrek kopurua emateko eskatu ahal izango dio sarrera egin zaion administrazioari.

13. artikulua. Errentak egozteko eta eratxikitze araubidepean diren erakundeak.

Bat. Etekinak egozteko araubidepeko erakundeen kasuan, kapitulu honetako 3. ataleko arauak bete beharko dira. Bazkideei egotzitako oinarriak ordainarazteko, Pertsona Fisikoen Errentaren gaineko Zergari, Ez-Egoiliarren Errentaren gaineko Zergari edo Sozietateen gaineko Zergari buruzko arauak —ekonomi itun honetan aipatutakoak— hartuko dira kontuan, bazkide horiek ordaindu behar duten zergaren arabera.

Bi. Eratxikitako errenten kasuan, araubide horren pean diren erakundeak kudeatu eta ikuskatzea erakunde horien helbide fiskaleko administrazioari dagokio.

Bazkide, erkide edo partaideei eratxikitako errenta ordainarazteko, Pertsona Fisikoen Errentaren gaineko Zergari, Ez-Egoiliarren Errentaren gaineko Zergari edo Sozietateen gaineko

Zergari buruzko arauak —ekonomi itun honetan aipatutakoak— erabiliko dira, beraiek ordaindu behar duten zergaren arabera.

3. ATALA **SOZIALATEEN GAINEKO ZERGA**

14. artikulua. Aplikatu beharreko arauak.

Bat. Sozietateen gaineko zerga tributu itundu bat da, eta araudi autonomoaren pean egongo da egoitza fiskala Euskadin duten subjektu pasiboek kasuan.

Hala ere, aurreko ekitaldiko eragiketen bolumena 10 milioi eurotik gorakoa izan eta ekitaldi horretako eragiketa guztien % 75 edo gehiago lurralde erkidean egin dituzten subjektu pasiboek lurralde erkideko arauak bete beharko dituzte.

Araudi autonomoa aplikatuko da baldin eta subjektu pasiboek egoitza fiskala lurralde erkidean badute, aurreko ekitaldiko eragiketen bolumena 10 milioi eurotik gorakoa izan bada eta ekitaldi horretako eragiketa guztien % 75 edo gehiago Euskadin egin badute; salbuespena izango da subjektu pasiboak talde fiskal baten parte badira, talde fiskal horren egoitza fiskala lurralde erkidean badago eta aurreko ekitaldiko eragiketen bolumena 10 milioi eurotik gorakoa izan bada, zeren, orduan, araudi autonomoa aplikatuko da bakarrik eragiketa guzti-guztiak Euskadin egin badira.

Bi. Eragiketen bolumentzat honakoa joko da: subjektu pasiboak, bere jardueran egindako ondasun-emateak eta zerbitzu-prestazioak direla-eta, ekitaldi batean hartutako kontraprestazioen guztirako zenbatekoa, balio erantsiaren gaineko zerga eta baliokidetasun-errekargua kenduta, halakorik badago.

Ondasun-ematetzat eta zerbitzu-prestaziotzat joko dira balio erantsiaren gaineko zerga araupetzen duen legerian halakotzat definituta dauden eragiketak.

Aurreko ekitaldia urtebete baino laburragoa bada, artikulua honetako Bat apartatuan aipatu den eragiketen bolumena kalkulatzeko, urte osoari dagokiona kalkulatu da ekitaldian egindako eragiketetatik abiatuta.

Hiru. Atal honetan ezarritakoa dela-eta, subjektu pasibo batek lurralde jakin batean jarduten duela esan daiteke baldin eta 16. artikuluan ezarritako irizpideen arabera lurralde horretan ondasunak eman edo zerbitzuak egiten baditu.

Lau. Jarduera hasi berria denean, lehenengo ekitaldian egindako eragiketen bolumenari begiratuko zaio, eta lehenengo ekitaldia urtebete baino laburragoa izan bada, urte osoari dagokiona kalkulatu da dena ekitaldian egindako eragiketetatik abiatuta. Harik eta ekitaldi horretako eragiketak zenbat izan diren eta non egin diren jakin arte, halakotzat hartuko dira, ondore guztietarako, subjektu pasiboak aurrez kalkulatu dituenak, jardueraren hasierako ekitaldian ustez egingo dituen eragiketen arabera.

15. artikulua. Zergaren ordainarazpena.

Bat. Foru-aldundiei dagokie, ez beste inori, egoitza fiskala Euskadin duten subjektu pasiboek sozietateen gaineko zerga ordainaraztea, baldin eta horiek aurreko ekitaldian eginak dituzten eragiketen bolumena gehienez ere 10 milioi eurokoa bada.

Bi. Aurreko ekitaldian egindako eragiketen bolumena 10 milioi euro baino handiagoa denean, subjektu pasiboek, egoitza fiskala edonon dutela ere, foru-aldundiei, Estatuko Administrazioari edo bi administrazio horiei ordainduko diete tributua, ekitaldi horretan lurralde horietariko batean edo bestean egindako eragiketen bolumenaren heinean.

Ekitaldian lurralde bakoitzean egindako eragiketen bolumenaren proportzioa kalkulatzeko hurrengo artikuluko arauak erabiliko dira, eta proportzioa ehunekoetan emango da, bi dezimalekin biribilduta.

16. artikulua. Eragiketak non egin diren.

Honako eragiketa hauek Euskadin egindakotzat hartuko dira:

A) Ondasun-emateak:

1.a. Ondasun higigarri gorpuztunak ematea, Euskadiko lurraldetik bertatik eskuratzailerean esku jartzen direnean. Ondasunak eskuratzailerean esku jartzeko garraiatu egin behar badira, igorpena edo garraiaketa hasten denean ondasunak non dauden, ematea hantxe egin dela uste izango da. Arau horrek honako salbuespenak izango ditu:

- a) Ematen dituenak berak eraldatu baditu ondasunak, ematea Euskadiko lurraldean egin dela uste izango da baldin eta emandako ondasunak eraldatzeko azken prozesua lurralde horretan egin bada.
- b) Emate horiek direla-eta Euskaditik kanpora industri arloko elementuren batzuk instalatu behar badira, emateak Euskadiko lurraldean egindakotzat hartuko dira baldin eta gertatzeko eta fabrikatzeko lanak lurralde horretan egin behar badira eta instalatu edo muntatzeko kostua kontraprestazio guztiaren %15 baino handiagoa ez bada.

Era berean, elementu industrialen emateak direla-eta Euskadin instalazioren bat egin behar denean, gertatu eta fabrikatzeko lanak lurralde erkidean egiten badituzte eta instalatu edo muntatzeko kostua kontraprestazio guztiaren %15 baino handiagoa ez bada, emate horiek ez dira Euskadiko lurraldean egindakotzat hartuko.

2.a. Energia elektrikoa ekoizten dutenek egindako emateak, energia hori sortzen duten zentroak Euskadiko lurraldean baldin badira.

3.a. . Ondasun higiezinaren emateak, ondasunok Euskadiko lurraldean baldin badaude.

B) Zerbitzuak egitea:

1.a. Zerbitzuak Euskadiko lurraldean egindakotzat hartuko dira, hain zuzen ere lurralde horretatik abiatuta ematen badira.

2.a. Ondasun higiezinekin zerikusituz zuzena duten zerbitzuak aurreko idatz-zatian xedatutakotik kanpora daude. Ondasun horiek Euskadin kokatuta baldin badaude hartuko dira, zerbitzu horiek, Euskadin egindakotzat.

3.a. Aseguru-eragiketak eta kapitalizazio-eragiketak, era berean, aurreko idatz-zatietan xedatutakotik kanpora daude. Halako kasuetan, ekonomi itun honetako 32. artikuluan jasotako arauak bete beharko dira.

C) Aurreko A) eta B) letretan xedatutakoa kontuan hartu behar bada ere, honako eragiketa hauek Euskadin egindakotzat hartuko dira, eragiketak egiten dituen subjektu pasiboak zerga-egoitza Euskadiko lurraldean baldin badauka:

1.a. Nekazaritza, basogintza, abeltzaintza edo arrantzako ustiategiek edo arrantzuntzi-armadoreek egindako ekoizkin-emateak, ekoizkinak naturalak baldin badira, eraldatzeko prozesurik jasan ez baldin badute eta ustiategien edo armadoreen landaketa, ustiapen edo harrapaketatik baldin badatoz zuzenean.

2.a. Garraio-zerbitzuak, baita etxez aldatzeko zerbitzuak, atoi-zerbitzuak eta garabi-zerbitzuak ere.

3.a. Garraio-baliabideak alokatzea.

- D) Artikulu honetan zehaztutako irizpideen arabera atzerrian egindakotzat hartzen diren eragiketak administrazio bati edo besteari eratzikiko zaizkio, gainerako eragiketetan erabiltzen den proportzio berberarekin.
- E) Hamalagarren artikuluko Bi idatz-zatiko bigarren lerroaldean jasotako eragiketak egiten ez dituzten erakundeek, zerga-egoitza Euskadin baldin badaukate, zergak foru aldundiei ordainduko dizkiete.

17. artikulua. Zerga kontura ordaintzea.

Bat. Sozietateen gaineko Zerga dela-eta egin beharreko atxikpenak eta konturako ordainketak administrazio bati edo besteari egingo zaizkio, itun honetan Pertsona Fisikoen Errentaren gaineko Zergari buruz ezarritako irizpideen arabera. Gainera, 12. artikuluan xedatutakoa aplikatuko da, administrazio bati edo besteari kontura egindako ordainketen eraginkortasunari dagokionez.

Bi. Zerga bi administrazioei ordaindu behar dieten subjektu pasiboek lurralde bakoitzean egindako eragiketen kopuruaren araberrako proportzioan egingo dituzte zergaren zatikako ordainketak. Hori dela eta, Zergarako azken aitorten-likidazioan adierazitako proportzioa bera erabiliko da.

Aurreko lerroaldean xedatutakoa gorabehera, beste proportzio bat aplikatu ahal izango da, ekonomi itun honen III. kapituluko 2. atalean aipatutako Araugintza Koordinatu eta Ebaluatzeko Batzordea jakitun jarri ondoren, eragiketa hauek egiten direnean:

- a) Bategitea, bananketa, aktibo-ekarpena eta balore-trukea.
- b) Lurralde erkidean edo foru lurraldean jarduera hastea, jarduerari uztea, hura zabaltzea edo murriztea, baldin eta horren ondorioz nabarmen aldatzen bada idatz-zati honetako lehenengo lerroaldean azaldutako irizpideari jarraituz kalkulaturako proportzioa.

Betiere, aldakuntza nabarmena dela uste izango da lurraldeetariko edozeini aplikatu beharreko proportzioak ehuneko 15 gora edo behera, gutxienez, egiten duenean.

Hiru. Administrazio bakoitzari benetan egindako zatikako ordainketa administrazio horri dagokion kuota-zatitik kenduko da.

18. artikulua. Zergak bi administrazioetan ordaintzen dituztenen kasuan, Zerga nola kudeatu.

Zergak bi administrazioetan ordaintzen dituztenen kasuan, honako arau hauek bete beharko dira:

Lehenengo. Zerga likidatuta lortutako emaitza Estatuko eta Euskadiko administrazioei egotziko zaie, zergaldi bakoitzean lurralde batean eta bestean egindako eragiketa-kopuruaren neurrian.

Bigarren. Zergak bi administrazioetan ordaindu behar dituzten subjektu pasiboek behar diren aitorten-likidazioak aurkeztu behar dizkiete administrazio biei, arauetan agindutako epeak eta formalitateak errespetatuta. Aitorten-likidazio horietan, betiere, aplika daitekeen proportzioa zein den eta administrazio bakoitzari dagozkion kuotak eta itzulketak zeintzuk diren zehaztu beharko da.

Hirugarren. Balizko itzulketak direla eta, administrazio bakoitzak bereak egingo ditu, dagokion proportzioan.

19. artikulua. Zergaren ikuskapena.

Bat. Subjektu pasiboak Euskadin badu egoitza fiskala, lurraldearen arabera eskumena daukan foru-aldundiak egingo du zergaren ikuskapena.

Hala ere, subjektu pasiboak aurreko ekitaldian egindako eragiketen bolumena 10 milioi eurotik gorakoa bada eta eragiketa guztien % 75 edo gehiago lurralde erkidean egina bada, subjektu pasiboa ikuskatzeko eskumena Estatuko Administrazioarena izango da.

Halaber, egoitza fiskala lurralde erkidean duten subjektu pasiboen ikuskapena lurraldearen arabera eskumena daukan foru-aldundiak egingo du baldin eta subjektu pasiboak aurreko ekitaldian egindako eragiketen bolumena 10 milioi eurotik gorakoa izan bada eta eragiketa guztien % 75 edo gehiago Euskadin egin bada.

Bi. Ikuskapenak egiteko lanetan, eskumena duen administrazioaren araudia bete beharko da, aurreko apartatuan ezarritakoaren arabera. Gainerako administrazioek lagundu egin diezaiokete eskumena daukan administrazioari.

Ikuskapen-lan horien ondorioz zorren bat jaso edo kopururen bat itzuli behar dela agertzen bada, eta zor edo kopuru hori bi administrazioei badagokie, ikuskapen-lan horiek egin dituen administrazioak kobratu edo itzuliko du. Dagozkion konpentsazioak gero emango dizkiote batak besteari, beharrezkoa bada. Eskumena daukan administrazioako organo ikuskatzaileek euren jardunaren emaitzen berri emango diete ukitutako gainerako administrazioei.

Hiru. Aurreko apartatuan xedatutakoak ezin ditu foru-aldundiek beren lurraldeetan egiaztapenak eta ikerketak egiteko dituzten eskumenak murriztu. Baina foru-aldundien jarduera horiek ez dute, administrazio-organoen eskudunen jardueren ondorioz egindako behin betiko likidazioak direla eta, inolako ondorio ekonomikorik izango zergadunengan.

Lau. Administrazio eskudunak egiaztapenetan zehaztutako proportzioak likidatutako betebeharrei dagokienean ere bete beharko ditu subjektu pasiboak. Horrek ez du esan nahi bi administrazioen artean behin betiko onartzen direnak bete behar ez direnik.

Bost. Ikuskatzeko eskumena ez duten tributuen administrazioek eskumen hori duen administrazioak egotzitako eragiketen bolumenaren kalkuluari eragin diezaioketen eragiketa guztiak egiaztatu ahalko dituzte, eragiketok egin diren lekua edozein dela ere, tributuen administrazio eskudunari egindako jarduketak guztiak jakinarazteko ondorioetarako soilik, eta horrek ez dio ondorio ekonomikorik sortuko zergadunari.

20. artikulua. Interes ekonomikoko elkartzeak, aldi baterako enpresa-elkartek eta talde fiskalak.

Bat. Euskadik ezarriko du interes ekonomikoko elkartzeen eta aldi baterako enpresa-elkarteen tributuen araubidea, halakoak osatzen dituzten erakunde guztiak foru-arautegiaren mende dauden kasuetan.

Erakundeok bazkideei egotziko diete lurralde batean zein bestean egindako eragiketetan dagokien zatia, eta bazkideek kontuan hartuko dute egotzi zaien zati hori euren eragiketen proportzioa zehazterakoan.

Bi.

1. Talde fiskalak kontsolidazio fiskalaren foru-araubidearen mende egongo dira baldin eta talde fiskala osatzen duten erakunde guztiak foru-arautegiaren mende badaude banako tributuen ordainketaren araubidean, eta lurralde erkideko kontsolidazio fiskalaren araubidearen mende egongo dira, aldiz, talde fiskala osatzen duten erakunde guztiak lurralde erkideko tributuen araubidearen mende badaude banako tributuen ordainketaren araubidean.

Hori dela eta, talde fiskaletik kanpokotzat joko dira beste araubidearen mende dauden erakundeak, halakorik badago.

Artikulu honetan ezarritako arauak jarraituz aplikagarria den arautegia duen tributuen administrazioak izango du talde fiskalak ikuskatzeko eskumena.

Estatuaren unean uneko arautegia bera erabiliko da beti talde fiskala, erakunde nagusia, mendeko erakundeak, erakunde ordezkaria, nagusitasun-maila eta taldearen barne-eragiketak definitzeko.

2. Arau hauek erabiliko dira talde fiskalen kontsolidazio fiskalaren araubidea aplikatzeko:

Lehenengo. Taldea osatzen duten erakundeek, itun honetan aipatutako arau orokorrak betez, banako tributu-ordainketaren araubideari dagokion aitortpena aurkeztuko dute.

Aurreko paragrafoan xedatutakoa eragotzi gabe, talde fiskalaren erakunde ordezkariak talde fiskalaren kontabilitate-orri bateratuak aurkeztuko dizkie administrazio biei.

Bigarren. Talde fiskalak lurraldeetako bakoitzean eginak dituen eragiketen bolumenaren heinean ordainduko dio beti tributua administrazioetako bakoitzari.

Hori dela eta, lurralde bakoitzean egindako eragiketen bolumena kalkulatzeko, talde fiskaleko erakunde bakoitzak lurralde horretan egindako eragiketak batu egingo dira, eta gero taldearteko bidezko kenketak egingo dira.

3. Aurreko 7. artikuluko Bat apartatuko c) letrako bigarren paragrafoan aipatzen diren kasuetan, 9. artikuluko Bat apartatuko a) letrako bigarren paragrafoan aipatzen direnetan, eta 23. artikuluko Bi apartatuko bigarren paragrafoetan, lurralde bakoitzean egindako eragiketen bolumenaren proportzioa kalkulatzeko, aurreko apartatuko bigarren arauan definitu den taldearen eragiketen bolumena aplikatuko da beti.

4. ATALA

EZ-EGOILIARREN ERRENTAREN GAINEKO ZERGA

21. artikulua. Aplikatu beharreko arauak.

Bat. Ez-egoiliarren errentaren gaineko zerga tributu itundu bat da eta Estatuak une bakoitzean ezarrita dituen funtsezko eta formazko arau berberak erabiliko dira hura eraentzeko.

Hala ere, atzerriko egoiliarren diren pertsona edo erakundeek Euskadin dituzten establezimendu iraunkorrei zerga honi buruzko arautegi autonomia aplikatuko zaie, 14. artikuluan ezarritakoarekin bat etorritik.

Zergadunak, aukerazko araubidea aplikatu ahal izateko ez-egoiliarren errentaren gaineko zergari buruzko arautegian ezarritako baldintzak betetzen dituela-eta, pertsona fisikoek errentaren gaineko zerga ordaintzea aukeratzen badu, lurraldearen arabera eskumena duen foru-aldundiaren arautegia hartuko da kontuan, baldin eta zergadunak lanetik eta ekonomia-jardueretatik Euskadiko lurraldean lortzen duen errentak Espainian lortzen duen errenta osoaren zatirik handiena egiten badu. Zergadunak itzulketarako eskubidea duenean, foru-aldundiek egingo diote itzulketa; berdin da errentak Espainiako zein lekutan lortu dituen.

Bi. Pertsona fisiko edo erakunde batek establezimendu iraunkorren bidez diharduela ulertuko da baldin eta, edozein titulu dela bide, edozein motatako instalazio edo lantokiren bat badu, ohikoa eta iraunkorra, eta bere jarduera bertan egiten badu osorik nahiz zati batean; edo bestela, subjektu pasibo ez-egoiliar horren izenean eta kontura agenteren batek egiten badu jarduera, kontratuak barne, subjektu pasiboak eskuetsita, eta agente horrek ohikoa badu subjektu pasibo ez-egoiliarren emandako ahalmen hori erabiltzea.

Establezimendu iraunkortzat joko dira, bereziki, zuzendaritzen egoitzak, sukurtsalak, bulegoak, lantegiak, tailerrak, biltegiak, dendak eta bestelako establezimenduak, meategiak, petrolio eta gas hobiak, harrobiak, nekazaritza, basogintza eta abeltzaintzako ustategiak eta baliabide naturalak aurkitu edo ateratzeko beste edozein gune, eta sei hilabete baino gehiago dirauten eraikuntza, instalazio edo muntatze obrak.

22. artikulua. Zergaren ordainarazpena.

Bat. Establezimendu iraunkorren bidez lortutako errentak zergapetzen direnean, administrazioetako batek ordainaraziko du zerga, edo bestela biek batera, 15. artikuluan adierazitako eran.

Bi. Establezimendu iraunkorrik gabe lortutako errentak zergapetzen direnean, lurraldea dela-eta eskumena daukan foru-aldundiak ordainaraziko du zerga, errentak Euskadin lortuak edo sortuak badira, hau da, ondoko baldintzak betetzen badira:

- a) Ekonomia-ustiategien etekinak, jarduerak Euskadiko lurraldean egiten badira.
- b) Azterlan, egitasmo, laguntza tekniko, kudeaketarako laguntza, zerbitzu profesional eta antzeko beste zerbitzu batzuetatik lortutako etekinak, zerbitzu horiek Euskadiko lurraldean egin edo erabiltzen badira. Eta Euskadiko lurraldean erabilitako zerbitzuak hauek izango dira: Euskadiko lurraldean gauzatzen diren enpresa-jardueretan edo jarduera profesionaletan erabilitakoak edo lurralde horretan kokatutako ondasunekin burututakoak.

Zerbitzu hori ez baldin bada burutzen den tokian bertan erabiltzen, non erabiltzen den hartuko da kontuan.

- c) Lanak, zuzenean edo zeharka, eragindako etekinak:
 - a') Euskadin garatutako jarduera pertsonal baten ondorio badira.
 - b') Pentsioak eta tankerako gainerako prestazioak, Euskadiko lurraldean egindako enplegu baten ondorio badira.
 - c') Era guztietako erakundeetako administrazio-kontseiluetako, ordezeko batzordeetako edo beste ordezkari-tza-organo batzuetako administratzaileen eta kideen ordainsariak, artikuluko honen Lau apartatuan aurreikusitakoaren arabera.
 - d) Artistek edo kirolariek Euskadiko lurraldean egindako jardun pertsonaletatik edo jardun horiekin zerikusia duen beste edozein jardueretatik ateratako etekinak, baita etekin horiek artistak edo kirolariak berak ez beste pertsona edo erakunderen batek hartzen baditu ere.
 - e) Euskal erakunde publikoetako funts propioetan parte hartzetik ateratako dibidenduak zein bestelako etekinak, baita erakunde pribatuetako funts propioetan parte hartzetik lortutakoak ere; baina, pribatuen kasuan, artikuluko honetako Lau apartatuan zehaztutako kopuruen barruan.
 - f) Kapital higigarriak emandako interes, kanon eta bestelako etekinak:
 - a') Ohiko bizilekua Euskadin duten pertsona fisikoek edo euskal erakunde publikoek ordaindutakoak, baita erakunde pribatuek edo establezimendu iraunkorrek ordaindutakoak ere, artikuluko honetako Lau apartatuan zehaztutako kopuruen barruan.
 - b') Euskadiko lurraldean erabilitako kapital-prestazioak ordaintzeko sariak direnean.
- Irizpide horiek ez baldin badatoz bat, kapitala (ordaindutako prestaziokoa) non erabili den hartuko da kontuan.
- g) Euskadiko lurraldean dauden ondasun higiezinetatik edo ondasun horiekin zerikusia duten eskubideetatik zuzenean nahiz zeharka ateratako etekinak.
 - h) Euskadiko lurraldean kokatutako hiri-ondasun higiezinen titularrak diren pertsona fisiko zergadunei egozten zaizkien errentak.

- i) Euskadiko pertsonak edo erakunde publikoek jaulkitako baloreen ondorioz gertatutako ondare-irabaziak, baita erakunde pribatuek jaulkitako baloreen ondorioz gertatzen direnak ere, artikuluko honetako Lau apartatua zehaztutako kopuruen barruan.
- j) Euskadiko lurraldean dauden ondasun higiezinak ondorioz, edo lurralde horretan bete behar diren edo erabil daitezkeen eskubideen ondorioz gertatutako ondare-irabaziak.

Partikularki, ondoko hauek letra honetan sartuta daudela ulertuko da:

- a') Erakunde bateko eskubide edo partaidetzak direla-eta gertatutako ondare-irabaziak, baldin eta erakunde horren aktiboa Euskadiko lurraldean kokatutako ondasun higiezinak osatuta bada gero ere. Ez da kontuan hartuko erakundea egoiliarra den ala ez.
- b') Erakunde bateko eskubide edo partaidetzak eskualdatu egin direla-eta gertatutako ondare-irabaziak, baldin eta eskubide edo partaidetza horiek Euskadiko lurraldean kokatutako ondasun higiezinak gozatzeko eskubidea ematen badiote titularrari. Ez da kontuan hartuko erakundea egoiliarra den ala ez.
- k) Euskadiko lurraldean kokatutako beste ondasun higigarri batzuen ondorioz, edo lurralde horretan bete behar diren edo erabil daitezkeen eskubideen ondorioz gertatutako ondare-irabaziak.

Hiru. Aurreko apartatua zehaztutako irizpide horien arabera errentaren bat bi lurraldeetan lortu dela pentsa badaiteke, lurralde historikoei egokituko zaie horien ordainarazpena ordaindu behar duena pertsona fisikoa bada eta ohiko bizilekua Euskadin bada. Pertsona juridikoa edo establezimendu iraunkorra bada, artikuluko honetako Lau apartatua xedatutakoa hartuko da kontuan.

Lau. Aurreko Bi apartatuko c) letraren c') letran b') eta e), f) eta i) letratan jasotako kasuetan eta Hiru apartatua jasotako kasuan, erakunde pribatuek edo establezimendu iraunkorrek ordaindutako errenten honako kopuru hauek hartuko dira Euskadiko lurraldean lortu edo sortutakotzat:

- a) Erakunde edo establezimendu iraunkor horiek zergak Euskadin bakarrik ordaintzen badituzte, ordaintzen dituzten errenta guztiak.
- b) Erakunde edo establezimendu iraunkor horiek zergak bi administrazioetan ordaintzen badituzte, Euskadin egindako eragiketen bolumenaren arabera ordaintzen duten errenten zatia.

Hala ere, letra honetan jasotako kasuetan, ekonomia-itun honen arabera likidazioa egoiliarra ez den horren izenean aurkezten duen pertsona, erakundea edo establezimendu iraunkorra ikuskatzeko eskumena duen lurraldeko administrazioak izango du etekin guztiak ordainarazteko eskumena, nahiz eta gero, behar bada, beste administrazioari konpentsazioa eman behar izan, beste administrazio horren lurraldean egindako eragiketen bolumenari dagokion heinean.

Era berean, ekonomia-itun honen arabera likidazioa egoiliarra ez den horren izenean aurkezten duen pertsona nahiz erakunde edo establezimendu iraunkorra ikuskatzeko eskumena duen lurraldeko administrazioak ordainduko ditu egoiliarrek ez direnei ordaindu beharreko itzulketak, nahiz eta gero, behar bada, beste administrazioari konpentsazioa egin behar izan, ordaindu behar duen erakundeak beste administrazio horren lurraldean egindako eragiketen bolumenari dagokion heinean.

Bost. Erakunde ez-egoiliarren ondasun higiezinak gaineko karga berezia, ondasun higiezina Euskadiko lurraldean bada, lurraldearen arabera eskumena daukan foru-aldundiari ordaindu behar zaio.

Sei. Establezimendu iraunkorrik ez duten egoiliarrei eska dakiekeen loteria eta apustu jakin batzuen sariak gaineko karga berezia Estatuko Administrazioari edo lurraldea dela-eta

eskumena daukan foru-aldundiari ordainduko zaio, saria irabazi duen loteriako dezimo, zatiki edo kupoia edo apustua zein lurraldetan (Euskadin edo lurralde erkidean) erosi den, horren arabera.

23. artikulua. Konturako ordainketak.

Bat. Honako zerga hau dela-eta establezimendu iraunkorrek euren errenten zioz egin behar dituzten zatikako ordainketak, atxikipenak eta konturako sarrerak goiko 2 eta 3. ataletan ezarritako arauetara jarraituz eskatuko dira.

Bi. Establezimendu iraunkorrik gabe diharduten zergadunen errentei dagozkien atxikipenak eta konturako sarrerak, berriz, errentak zein lurraldetan lortu, hango administrazioak eskatuko ditu, aurreko artikuluan xedatutakoarekin bat etorritik. Ikusapena ere eskumena daukan administrazioeko organoek egingo dute, aurreko artikuluan xedatutakoarekin bat etorritik.

Aurreko paragrafoan jartzen duena kontuan hartu behar bada ere, aurreko artikuluko Bi apartatuko e), f) eta i) letretan jasotako kasuetan eta artikuluko bereko Hiru apartatuko jasotako kasuan, foru-aldundiek eskatuko dituzte, atxikipena egitera behartuta dagoenak Euskadin egindako eragiketen bolumenaren proportzioan, aurreko 3. atalean ezarritako arauak erabiliz.

Hiru. Gainera, 12. artikuluan xedatutakoa aplikatuko da, administrazio batari edo besteari kontura egindako ordainketen eraginkortasunari dagokionez.

Lau. Establezimendu iraunkorrik ez duten ez-egoiliarrei eska dakiekeen loteria eta apustu jakin batzuen sariaren gaineko karga bereziari dagozkion atxikipenak Estatuko Administrazioari edo lurraldea dela-eta eskumena daukan foru-aldundiari ordainduko zaio, saria irabazi duen loteriako dezimo, zatiki edo kupoia edo apustua zein lurraldetan (Euskadin edo lurralde erkidean) erosi den, horren arabera.

23. bis artikulua. Zergaren kudeaketa eta ikusapena establezimendu iraunkorraren bidez lortutako errentak kargatzen direnean.

Bat. Establezimendu iraunkorraren bidez lortutako errentak kargatzen direnean, eta zergak administrazio biei ordaintzen bazaizkie, aurreko 18. artikuluan Zerga kudeatzeko aurrez ikusitako arauak aplikatuko dira.

Bi. Establezimendu iraunkorraren bidez lortutako errentak kargatzen direnean, Administrazio eskudunak egingo du Zergari dagokion ikusapena, aurreko 19. artikuluan aurrez ikusitako arauak aplikatuz.

4. BIS ATALA KREDITU-ERAKUNDEETAKO GORDAILUEN GAINKO ZERGA

23 ter artikulua. Aplikatu beharreko arauak eta zergaren ordainarazpena.

Bat. Kreditu-erakundearen gordailuen gaineko zerga tributu itundu bat da eta Estatuak une bakoitzean ezarritako dituen edukizko eta formazko arau berberak erabiliko dira hura eraentzeko.

Aurrekoa bete beharrekoa izango bada ere, lurralde historikoetako erakunde eskudunek zerga honen karga-tasak ezar ditzakete, lurralde erkidean unean-unean indarrean dauden arauak ezarritako mugen eta baldintzen barruan.

Lurralde historikoetako erakunde eskudunek, halaber, aitorpen- eta sarrera-ereduak onesteko eta likidazio-aldi bakoitzeko sarrera-epeak zehazteko gaitasuna izango dute. Baina eredu horietako datuak, gutxienez, lurralde erkidean erabiltzen diren berberak izan behar dira; eta epe horiek, berriz, ez dira Estatuko Administrazioak ezarritakoez oso bestelakoak izango.

Bi. Estatuko Administrazioak edo lurraldearen arabera eskuduna den foru-aldundiak egin behar du zergaren ordainarazpena, hirugarrenen funtsak dauden egoitza nagusia, sukurtsalak edo bulegoak lurralde erkidean edo Euskadiko lurraldean dauden kontuan hartuta.

Hala ere, merkaturatze-sistema ez-presentzialen bidez jasotako funtsen ondoriozko zerga-ordainarazpena, bai eta lurralde bati atxikitzeko modukoak ez direnen gainekoa ere, Euskadiko Lurralde Historikoei egotziko zaie, lurraldeari atxikitako gordailuetan duen partaidetzaren arabera dagokion proportzioan.

Hiru. Zergaren konturako ordainketak administrazio batek edo besteak eskatuko ditu aurreko apartatuan xedatutako irizpidearen arabera.

4. TER ATALA

ENERGIA ELEKTRIKOAREN EKOIZPENAREN BALIOAREN GAINEKO ZERGA

23 quáter artikulua. Aplikatu beharreko arauak eta Zergaren ordainarazpena.

Bat. Energia elektrikoaren ekoizpenaren balioaren gaineko Zerga itundutako tributua da, eta Estatuak une bakoitzean ezarrita dituen funtsezko eta formazko arau berberak erabiliko dira hura eraentzeko.

Nolanahi ere, lurralde historikoetako erakunde eskudunek aitortenak eta sarrerak egiteko ereduak onetsi ahal izango dituzte, baina eredu horietan lurralde erkideko ereduak datu berberak jasoko dira, gutxienez; eta sarrerak egiteko epeak jarri ahal izango dituzte likidazio-aldi bakoitzerako, baina epe horiek ez dute alde handirik izango Estatu Administrazioak ezartzen dituenekin.

Bi. Zergaren ordainarazpena Estatu Administrazioari egokituko zaio, energia elektrikoa ekoizteko instalazioak lurralde erkidean badaude; eta euskal lurraldean badaude, berriz, lurraldea delaeta eskumena daukan foru-aldundiari.

Hiru. Zergaren konturako ordainketak administrazio batek edo besteak eskatuko ditu, aurreko Bi zenbakian jasotako irizpidearekin bat.

Lau. Balizko itzulketak direla eta, administrazio bakoitzak bereak egingo ditu, bakoitzari dagokion kopuruan.

4. QUATER ATALA

ENERGIA NUKLEOELEKTRIKOA SORTZETIK DERIBATUTAKO ERREGAI NUKLEAR AGORTUA ETA HONDAKIN ERRADIOAKTIBOAK SORTZEAREN GAINEKO ZERGA, ETA ERREGAI NUKLEAR AGORTUA ETA HONDAKIN ERRADIOAKTIBOAK INSTALAZIO ZENTRALIZATUETAN BILTEGIRATZEAREN GAINEKO ZERGA

23 quinquies artikulua. Aplikatu beharreko arauak eta zergen ordainarazpena.

Bat. Energia nukleoelektrikoa sortzetik deribatutako erregai nuklear agortua eta hondakin erradioaktiboak sortzearen gaineko Zerga eta Erregai nuklear agortua eta hondakin erradioaktiboak instalazio zentralizatueta biltegiratzearen gaineko Zerga itundutako tributua da, eta Estatuak une bakoitzean ezarrita dituen edukizko eta formazko arau berberak erabiliko dira haiek eraentzeko.

Nolanahi ere, lurralde historikoetako erakunde eskudunek aitortenak eta sarrerak egiteko ereduak onetsi ahal izango dituzte, baina eredu horietan lurralde erkideko ereduak datu berberak jasoko dira, gutxienez; eta sarrerak egiteko epeak jarri ahal izango dituzte likidazio-aldi bakoitzerako, baina epe horiek ez dute alde handirik izango Estatu Administrazioak ezartzen dituenekin.

Bi. Energia nukleoelektrikoa sortzetik deribatutako erregai nuklear agortua eta hondakin erradioaktiboak sortzearen gaineko Zergaren ordainarazpena Estatuaren Administrazioari edo lurraldea dela-eta eskumena daukan foru-aldundiari dagokio, erregai nuklear agortua eta/edo hondakin erradioaktiboak ekoizten eta/edo biltegiratzen diren instalazioak lurralde erkidean ala euskal lurraldean dauden begiratuta.

Hiru. Erregai nuklear agortua eta hondakin erradioaktiboak instalazio zentralizatueta biltegitzearen gaineko Zergaren ordainarazpena Estatuaren Administrazioari edo lurraldea dela-eta eskumena daukan foru-aldundiari dagokio, erregai nuklear agortua eta/edo hondakin erradioaktiboak ekoizten eta/edo biltegitzen diren instalazioak lurralde erkidean ala euskal lurraldean dauden begiratuta.

Lau. Zerga hauen konturako ordainketak administrazio batek edo besteak eskatuko ditu, aurreko Bi eta Hiru zenbakietan jasotako irizpideekin bat..

4. QUINTAS ATALA GASAREN, PETROLIOAREN ETA KONDENSATUEN ERAUZTE BALIOAREN GAINEKO ZERGA

23 sexies artikulua. Aplikatu beharreko arauak eta zergaren ordainarazpena.

Bat. Gasaren, petrolioaren eta kondensatuen erauzte balioaren gaineko zerga tributu itundu bat da eta Estatuak une bakoitzean ezarrita dituen edukizko eta formazko arau berberak erabiliko dira hura eraentzeko.

Lurralde historikoetako erakunde eskudunek, hala ere, aitorten- eta sarrera-ereduak onesteko eta likidazio-aldi bakoitzeko sarrera-epeak zehazteko gaitasuna izango dute. Baina eredu horietako datuak, gutxienez, lurralde erkidean erabiltzen diren berberak izan behar dira; eta epe horiek, berriz, ez dira Estatuaren Administrazioak ezarritakoez oso bestelakoak izango.

Bi. Zergaren ordainarazpena Estatuaren Administrazioak edo eskuduna den foru-aldundiak egingo du, maiatzaren 21eko 8/2015 Legearen 22. artikulua aipatzen duen hidrokarburo-hobien ustiapen-kontzesioaren erreferentziako perimetroaren barruko eremua lurralde erkidean edo Euskadiko lurraldean dagoen kontuan hartuta (8/2015 Legea, maiatzaren 21ekoa, Hidrokarburoen Sektorearen urriaren 7ko 34/1998 Legea aldatu eta hidrokarburoen esplorazio, ikerketa eta ustiatetarekin loturiko hainbat zerga-neurri eta zerga-neurri ez direnak arautzen dituen).

Aurreko paragrafoan adierazitako perimetroaren barruko eremua lurralde erkidean eta Euskadiko lurraldean baldin badago, zergaren ordainarazpena bi administrazioen artean egingo da, modu proportzionalan.

Hiru. Zergaren konturako ordainketak administrazio batek edo besteak eskatuko ditu Bi apartatuan xedatutako irizpidearen arabera.

Lau. Bidezkoak diren itzulketak egitea administrazioen lana izango da, bakoitzari dagokion proportzioan.

5. ATALA ONDAREAREN GAINEKO ZERGA

24. artikulua. Aplikatu beharreko arauak eta zergaren ordainarazpena.

Ondarearen gaineko zerga itundutako zerga da eta araudi autonomoari dagokio.

Lurralde historikoetako foru aldundi eskudunak edo Estatuak eskatuko du, zergaduna Pertsona Fisikoen Errentaren gaineko Zerga bidez administrazio bati edo besteari lotuta dagoen kontuan hartuta, eta zergapean diren ondare-elementuak zein lurraldetan dauden kontuan hartu gabe.

Zerga ordaintzeko betebeharrak errealak duten subjektu pasiboaren kasuan, ondasun eta eskubide guztiak Euskadin baldin badaude, foru aldundiei egokituko zaie zerga ordainaraztea. Horretarako, Euskadin kokatuta daudela ulertuko da, hain zuzen ere, lurralde horretan dauden, erabil litezkeen edo bete behar diren liratekeen ondasun eta eskubideak.

Azken egoitza Euskadin izan duten ez-egoiliarrek Ondarearen gaineko Zerga norberaren betebeharraren arabera ordaintzea aukeratzen dutenean, lurralde erkidean edo foru lurraldean ordaindu ahal izango dute eta aukeratzen duten lurraldeko arautegia bete beharko dute.

6. ATALA

OINORDETZEN ETA DOHAINTZEN GAINEKO ZERGA

25. artikulua. Aplikatu beharreko arauak eta zergaren ordainarazpena.

Bat. Oinordetzen eta dohaintzen gaineko zerga tributu itundu bat da eta araudi autonomoaren pean dago.

Lurraldea dela-eta eskumena daukan foru-aldundiak ordainaraziko du zerga hori honako kasu hauetan:

- a) «Mortis causa» eskuraketetan, eta bizitza-aseguruen onuradunek aseguruaren heriotzaren ondoren kopuruak hartzen dituztenean, baldin eta sortzapen-egunean kausatzailearen ohiko bizilekua Euskadin badago. Kausatzailearen bizilekua atzerrian badago, zergadunek bizilekua Euskadin badute.
- b) Ondasun higiezinaren eta haien gaineko eskubideen dohaintzetan, ondasun horiek Euskadiko lurraldean kokatuta baldin badaude. Ondasun higiezinak atzerrian badaude, dohaintza-hartzaileak ohiko bizilekua Euskadin baldin badauka sortzapenaren egunean.

Letra honetan xedatutakoa dela-eta, ondasun higiezinaren dohaintzat hartuko dira urriaren 23ko 4/2015 Baloreen Merkatuaren Legegintzako Errege Dekretuko 314. artikuluan aipatutako doako balore-eskualdatzeak (4/2015 Legegintzako Errege Dekretua, Balore Merkatuaren Legearen testu bategina onartzen duena).

- c) Gainerako ondasun eta eskubideen dohaintzetan, dohaintza-hartzaileak ohiko bizilekua Euskadin baldin badauka sortzapenaren egunean.
- d) Zergadunak egoitza atzerrian daukanean, baldin eta ondasunen eta eskubideen baliorik gehiena Euskadiko lurraldean baldin badago, eta bizi-aseguru-erakundeekin egin bada, edo Euskadiko lurraldean egin bada bertan jarduten duten atzerriko erakundeekin.

Letra honen ondorioetarako, Euskadiko lurraldean kokatuta daudela ulertuko da, hain zuzen ere, lurralde horretan dauden, erabil litezkeen edo bete beharko liratekeen ondasun eta eskubideak.

Bi. Aurreko apartatuko a) eta c) letretan jasotako kasuetan, foru-aldundiek lurralde erkideko arauak aplikatuko dituzte, kausatzaileak edo dohaintza-hartzaileak egun gehiago pasa baditu lurralde erkidean aurreko bost urteetako denboraldian, zergaren sortzapenaren egunetik kontatuta. Autonomia Estatutuaren 7.2. artikulua arabera izaera politiko euskal herritar izaten jarraitu dutenei ez zaie arau hori ezarriko.

Hiru. Agiri baten bidez dohaintza-emaile bakar batek dohaintza-hartzaile bati ondasunak edo eskubideak dohaintzan ematen badizkio eta, Bat apartatuaren arabera, etekina lurralde erkidean eta Euskadiko lurraldean sortutakoa dela pentsatu behar bada, eskualdatutako ondasun eta eskubide guztien balioari lurralde bakoitzean legokiokeen batez besteko tasa aplikatuko zaio, bakoitzaren arauen arabera eta lurralde bakoitzari egotzitako dohaintzen balioaren etekinaren gainean, eta hortik aterako da lurralde bakoitzari dagokion kuota.

Lau. Dohaintzak metatu behar diren kasuetan, Euskadiri zein kuota dagokion jakiteko, metatutako dohaintza guztien balioari legokiokeen batez besteko tasa aplikatu behar zaio egun eskualdatuta dauden ondasun eta eskubideen balioari, bere arauen arabera.

Ondorio horietarako, aurreko dohaintzetatik datozenak eta gaur egungo eskualdaketatik datozenak izango dira ondasun eta eskubide metatu guztiak.

7. ATALA

BALIO ERANTSIAREN GAINEKO ZERGA

26. artikulua. Aplikatu beharreko arautegia.

Balio Erantsiaren gaineko Zerga itundutako zerga da. Bera arautzeko, Estatuak garaian garaian ezarrita dituen edukizko eta formazko arau berberak erabiliko dira. Lurralde historikoetako erakunde eskudunek, hala ere, aitopen- eta sarrera-ereduak onesteko eta likidiazio-aldi bakoitzeko sarrera-epeak zehazteko gaitasuna izango dute. Baina eredu horietako datuak, gutxienez, lurralde erkidean erabiltzen diren berberak izan behar dira; eta epe horiek, berriz, ez dira Estatuko administrazioak ezarritakoez oso bestelakoak izango.

27. artikulua. Zergaren ordainarazpena.

Bat. Balio erantsiaren gaineko zerga ordainarazteko, honako arau hauek bete behar dira:

Lehenengo. Euskadiko lurraldean bakarrik jarduten duten subjektu pasiboek tributu guztiak dagokien foru-aldundian ordaindu behar dituzte; eta lurralde erkidean bakarrik jarduten dutenek Estatuko Administrazioan ordaindu behar dituzte.

Bigarren. Lurralde erkidean eta Euskadiko lurraldean jarduten duten subjektu pasiboek tributuak bi administrazioetan ordaindu behar dituzte, lurralde bakoitzean egindako eragiketen bolumenaren proportzioan. Proportzio hori zehazteko, hurrengo artikuluan jasotako lotura-puntuak erabili beharko dira.

Hirugarren. Aurreko urtean 10 milioi euro baino eragiketa-bolumen handiagoa egin ez duten subjektu pasiboek, eragiketak batean zein bestean eginda ere, tributuak Estatuko Administrazioan ordainduko dituzte, egoitza fiskala lurralde erkidean baldin badaukate, eta egoitza fiskala Euskadin baldin badaukate, berriz, dagokion foru-aldundian.

Bi. Eragiketen bolumen osoa haxe izango da: ondasunak ematerakoan eta zerbitzuak egiterakoan subjektu pasiboak lortu dituen kontraprestazioen zenbatekoa, balio erantsiaren gaineko zerga eta baliokidetasun-errekargua alde batera utzita, halakorik badago.

Jardueran hasi berriak direnen kasuan, 10 milioi euroko kopurua zenbatzeko, egutegiko lehenengo urtean egindako eragiketen bolumena hartuko da kontuan.

Jardueran emandako lehenengo urtea ez baldin bada egutegiko urtebete, kopuru hori zenbatzeko, jardueraren hasieratik egindako eragiketarik abiatuko da urte osokoa kalkulatzeko.

Hiru. Atal honetan ezarritakoa dela-eta, subjektu pasibo batek lurralde jakin batean jarduten duela esan daiteke baldin eta 28. artikuluan ezarritako irizpideen arabera lurralde horretan ondasunak eman edo zerbitzuak egiten baditu.

Lau. Europako Erkidego barruko ondasunen trafikoarekin zerikusia duten eragiketen ziozko zerga, artikulua honetako hurrengo apartatueta aipatuko diren kasuetan izan ezik, aurreko Bat apartatuan azaldutako eran ordainaraziko da.

Bost. Europako Erkidego barruan garraiobide berrien erosketen ziozko zerga, baldin eta erosketak egiten dituzten pertsona edo erakundearen eragiketarik balio erantsiaren gaineko zerga ordaindu beharretik erabat salbuetsita badaude edo zerga horren pean ez badaude, garraiobideak behin betiko matrikulatzen diren lurralde erkideko edo Euskadiko lurraldeko administrazioak ordainaraziko du.

Sei. Jarraian azalduko diren eragiketarik egiten direnean Estatuko Administrazioak edo lurraldearen arabera eskumena daukan foru-aldundiak ordainaraziko du zerga, subjektu pasiboaren egoitza non dagoen, lurralde erkidean edo foru-lurraldean:

- a) Europako Erkidego barruko ondasunen eskuraketak, baldin eta eskuraketak zergapean badaude halaxe aukeratu delako edo zergari buruzko arauetan ezarritako muga kuantitatiboa gainditu delako, eta horiek egiten dituztenak zergari kenketa osoa edo partziala egiteko eskubiderik ez dakarten eragiketak soilik egiten dituzten subjektu pasiboak badira, edo enpresari nahiz profesional gisa ez diharduten pertsona juridikoak badira.
- b) Europako Erkidego barruko ondasunen eskuraketak, baldin eta araubide erraztuan, nekazaritza, abeltzaintza eta arrantzaren araubide berezian edo baliokidetasun-errekarguaren araubidean egiten badira.

28. artikulua. Eragiketen lekua.

Bat. Ekonomi itun honen ondorioetarako, honako arau hauek betetzen dituztenak hartuko dira, Zergari lotuta dauden eragiketen artetik, Euskadiko lurralde historikoetan egindakotzat:

A) Ondasun-emateak:

1.a. Ondasun higigarri gorpuztunak Euskadin eman direla esan daiteke, hain zuzen ere, lurralde horretatik uzten badira hartu behar dituenaren eskuetan. Aldiz, ondasun horiek garraiatu egin behar badira jaso behar dituenaren eskuetan uzteko, halakoetan, espedizioa edo garraioa hasten denean ondasunak non dauden, han egindakotzat hartuko da ematea. Arau horrek honako salbuespen hauek izango ditu:

- a) Ondasun horiek eraldatuta baldin badaude eta ondasunak eman behar dituenak berak eraldatu baditu, azken eraldatze-prozesua Euskadin egin bada hartuko dira, ondasun horiek, Euskadiko lurraldean egindakotzat.
- b) Emateak direla-eta industriako elementuren batzuk instalatu behar badira, emate horiek Euskadin egindakotzat hartu ahal izateko, honako baldintza hauek bete beharko dira: gertatzeko eta fabrikatzeko lanak lurralde horretan egin behar dira; eta instalatu edo muntatzeko kostuak ezin du kontraprestazio guztiaren %15 baino handiagoa izan.

Era berean, elementu industrialen emateak direla-eta Euskadin instalazioren bat egin behar denean, gertatu eta fabrikatzeko lanak lurralde erkidean egiten badituzte eta instalatu edo muntatzeko kostua kontraprestazio guztiaren %15 baino handiagoa ez bada, emate horiek ez dira Euskadiko lurraldean egindakotzat hartuko.

- c) Elkarteko beste estatu batetik abiatuta igorri edo garraiatu behar diren ondasunak badira, eta Balio Erantsiaren gaineko Zergari buruzko arautegian ezarritako betekizunak betetzen badira urrutiko salmentaren araubidea aplikatzeko, ondasun-ematea Euskadin egindakotzat joko da ondasunaren garraioa Euskadiko lurraldean amaitzen bada.

2.a. Energia elektrikoa ekoizten dutenen emateak, energia hori sortzen duten zentroak Euskadiko lurraldean baldin badaude.

3.a. Ondasun higiezinaren emateak, ondasunok Euskadiko lurraldean badaude.

B) Zerbitzuak egitea:

1.a. Zerbitzuak Euskaditik kanpokoei egiten zaizkienean hartuko dira lurralde horretan egindakotzat.

2.a. Ondasun higiezinekin lotura zuzena daukaten zerbitzuak aurreko idatz-zatian xedatutakotik kanpora daude, salbuespen modura. Ondasunak Euskadiko

lurraldean kokatuta baldin badaude hartuko dira, zerbitzu horiek, Euskadin egindakotzat.

- 3.a. Aseguru-eragiketak eta kapitalizazio-eragiketak, era berean, aurreko idatz-zatietan xedatutakotik kanpora daude. Halako kasuetan, ekonomi itun honetako 32. artikuluan jasotako arauak bete beharko dira.
- C) Aurreko letretan xedatutakoa kontuan hartu behar bada ere, honako eragiketa hauetan, Zerga ordainarazteko eskumena Estatuko Administrazioak edo foru aldundi eskudunak izango du, subjektu pasiboaren zerga-egoitza lurralde erkidean edo Euskadin dagoen kontuan hartuta:
- 1.a. Nekazaritza, basogintza, abeltzaintza edo arrantzako ustiatzeko edo arrantzuntzi-armadoreek produktu naturalekin egindako emateak, ez baldin badute eraldatzeko prozesurik jasan eta ustiatzeko edo armadore horien landaketa, ustiapen edo harrapaketatik baldin badatoz zuzenean.
- 2.a. Garraio-zerbitzuak, baita etxez aldatzeko garraiabideak eta atoi- nahiz garabi-zerbitzuak ere.
- 3.a. Garraiabideak alokatzea.

Bi. Artikulu honetan aipatutako eragiketak egiten ez dituzten erakundeek foru aldundiei ordainduko diete zergak, zerga-egoitza Euskadiko lurraldean badute.

29. artikulua. Zergaren kudeaketa eta ikuskapena.

Bat. Zerga-likidazioen emaitza dagokien administrazioei egotzi beharko zaie, lurralde bakoitzean egutegiko urtebetean lortu den kontraprestazioen zenbatekoaren arabera eta balio erantsiaren gaineko zerga alde batera utzita. Kontraprestazio horiek, hain zuzen ere, egindako ondasun-emate eta zerbitzuei dagozkie, batzuetan kargatu eta beste batzuetan salbuetsi egingo direnak eta, salbuetsitako kasuan, kenketa-eskubidea dakartenak.

Bi. Egutegiko urte bakoitzean behin-behingo aplikatu behar diren proportzioak aurreko urteko eragiketen arabera zehaztuko dira. Jarduera hasten den egutegiko urteko likidazioaldietan behin-behinean aplikatu behar den proportzioa subjektu pasiboak berak kalkulatu du, beraren ustez lurralde bakoitzean egingo dituen eragiketak kontuan hartuta, hala ere azkenean erregularizazioa egingo da.

Aurreko paragrafoan agindutakoa eragotzi gabe, honako kasu hauetan beste proportzio bat aplika daiteke, betiere ekonomia-itun honetako III. kapituluko II. atalean aipatutako Araugintza Koordinatu eta Ebaluatzeko Batzordeari jakinarazi ondoren:

- a) Aktiboak bategitea, bereiztea eta ekartzea.
- b) Lurralde erkidean edo foru-lurraldean jardueraren bat hasi, amaitu, zabaldu edo murrizten denean, baldin eta apartatu honetako lehen paragrafoan zehaztutako irizpidearen arabera kalkulatuak proportzioa nabarmen aldarazten bada.

Aldakuntza nabarmena dela uste izango da lurraldeetako edozeini aplikatu beharreko proportzioak % 15 gora edo behera, gutxienez, egiten duenean.

Hiru. Subjektu pasiboak, egutegiko urte bakoitzean zergaren gainean egindako azken aitorten-likidazioan, behin betiko proportzioak kalkulatu ditu —garai horretan egindako eragiketen arabera—, eta aurreko likidazioaldietan administrazio bakoitzarekin egindako deklarazioak erregularizatu egingo ditu, dagokion moduan.

Lau. Subjektu pasiboek zergaren aitorten-likidazioak aurkeztuko dizkiete zerga ordainarazteko eskumena daukaten administrazioei. Aitorten-likidazio horietan, aplikatu

beharreko proportzioak eta administrazioetako bakoitzari dagozkion kuotak jaso beharko dira beti.

Bost. Dagozkion itzulketak egitea administrazioen lana izango da, bakoitzari dagokion proportzioan.

Sei. Ikuskapena honako irizpide hauen arabera egingo da:

- a) Tributuak foru-aldundietan edo, hala badagokio, Estatuko Administrazioan, baina bietako batean bakarrik ordaindu behar dituzten subjektu pasiboak ikuskatzea administrazio horietako bakoitzeko tributu-ikuskaritzen lana izango da.
- b) Tributuak lurralde erkidean edo Euskadiko lurraldean egindako eragiketen bolumenaren proportzioan ordaindu behar dituzten subjektu pasiboak ikuskatzeko, honako arau hauek bete beharko dira:

Lehenengo. Egoitza fiskala lurralde erkidean daukaten subjektu pasiboak: Estatuko Administrazioako organoek egingo dituzte egiaztapena eta ikerketa. Administrazio horrek, era berean, subjektu pasiboak administrazio eskudun guztietan tributuen aldetik duen egoera erregularizatzeko lana hartuko du, administrazio batari eta besteari dagokion tributu-proportzioa barne.

Subjektu pasiboak aurreko ekitaldian eragiketen % 75 edo gehiago Euskadiko lurraldean egina badu —edo % 100, erakunde-talderako araubide berezian sartzen diren erakundeen kasuan—, zehaztutako lotura-puntuen arabera, lurraldearen arabera eskumena daukan foru-aldundiak egingo ditu egiaztapena eta ikerketa, Estatuko Administrazioak laguntza eman badezake ere.

Bigarren. Egoitza fiskala Euskadiko lurraldean daukaten subjektu pasiboak: egoitza fiskalari dagokion foru-administrazioako organo eskudunek egingo dituzte egiaztapena eta ikerketa, Estatuko Administrazioak laguntza eman badezake ere. Ondorioak eskumena duten administrazio guztietan bete beharko dira, administrazio horiei dagokien tributazio-proportzioa barne. Subjektu pasiboak aurreko ekitaldian eragiketen % 75 edo gehiago lurralde erkidean egina badu, zehaztutako lotura-puntuen arabera, eskumena Estatuko Administrazioarena izango da, foru-aldundiek laguntza eman badezakete ere.

Jardun horien ondorioz, zorren bat jaso edo kopururen bat itzuli behar dela agertzen bada, eta zor edo kopuru hori bi administrazioei badagokio, ikuskapen-lan horiek egin dituen administrazioak kobratu edo itzuliko du. Dagozkion konpentsazioak gero emango dizkiote batak besteari, beharrezkoa bada. Eskumena daukan administrazioako organo ikuskatzaileek euren jardunaren emaitzen berri emango diete ukitutako gainerako administrazioei.

Hirugarren. Aurreko apartatuan xedatutakoa bete egin behar bada ere, horrek ezin ditu foru-aldundiei —nori bere lurralde barruan— egiaztapenak eta ikerketak egiteko dagozkien eskumenak murriztu. Baina, era berean, foru-aldundien jarduketek ezin dute, administrazio eskudunetako organoen jarduketan ondorioz egindako behin betiko likidazioen inguruan, zergadunen artean inongo ondorio ekonomikorik izan.

Laugarren. Administrazio eskudunak egiaztapenetan ezarritako proportzioak subjektu pasiboak ere bete beharko ditu, likidatutako betebeharren inguruan. Horrek ez du esan nahi administrazio eskudunen artean behin betiko zehazten dituztenak bete behar ez direnik, hala ere.

Bostgarren. Ikuskatzeko eskumena ez duten tributu-administrazioek eskumen hori duen administrazioak egotzitako eragiketa-bolumenaren kalkulari eragin diezaioketen eragiketa guztiak egiaztatu ahaliko dituzte, eragiketok egin diren lekua edozein dela ere, tributu-administrazio eskudunari egindako jarduketa guztiak jakinarazteko ondorioetarako soilik, eta horrek ez dio ondorio ekonomikorik sortuko zergadunari.

Zazpi. Erakunde-talderako araubide berezian sartzen diren erakundeek 7. atal honetan jasota dauden arauak aplikatuta ordainduko dituzte tributuak, berezitasun hauek aintzat izanik:

Lehenengo. Erakunde-taldetik kanpokotzat joko dira mendeko erakundeak, baldin eta haien ikuskapena egiteko ardura duten organoak, aurreko Sei apartatuan jasota dauden arauak jarraituz, erakunde nagusiari aplikatu beharreko administrazioak ez beste administrazio batekoak badira, foru-administrazioa nahiz administrazio erkidea izan.

Bigarren. Erakunde-taldea osatzen duten erakundeek, itun honetan aipatutako arau orokorrak betez, banako tributu-ordainketaren araubideari dagokion aitorpena aurkeztuko dute. Zergari buruzko arauak, eta, hala dagokionean, erakunde-talderako araubide bereziko arauak ere bai, banaka aplikatutakoan, hortik sortzen diren zenbatekoak zehaztuko dira aitorpen horretan.

Taldea osatzen duten erakundeetako bakoitzak banaka kalkulatu du administrazioetako bakoitzari egotz dakioken aitorpenaren emaitza, horretarako 7. atal honetan ezarritako gainerako arauak erabilia.

Hirugarren. Erakunde-taldeak bat eginda aurkeztutako aitorpen-likidazioetan kontuan hartu behar diren zenbatekoak, aurreko arau horri jarraituz kalkulatu, foru-aldundietako bakoitzari edo Estatuko Administrazioari dagozkion emaitzen baturatik sortuko dira, baina ezin izango dira aldi berean tributu-administrazio bati baino gehiagori dagozkion zenbatekoak batu.

Laugarren. Taldea osatzen duten erakundeek zein lurraldetan jarduten duten, lurralde horretako tributu-administrazioan bete beharko dituzte erakunde nagusiek beren berariazko betebeharrak.

Bostgarren. Erakunde-talderako araubide bereziak ez ditu inola ere aldatuko itun honetan zehaztutako arauak, ez eta, bereziki, lurraldeetako bakoitzean izaten diren eragiketen bolumena finkatzeko erabili beharreko arauak ere.

Zortzi. Europako Erkidegoaren barruan egindako emate eta eskuratzeeen errekapitulazio-deklarazioak, hain zuzen ere, subjektu pasiboari egiaztapenak eta ikerketak egiteko eskumena daukan tributu-administrazioan aurkeztu beharko dira.

Bederatzi. Artikulu honetako aurreko apartatuetan agindutakoa eragotzi gabe, baldin eta beren jarduerari dagozkion ondasun-emateak edo zerbitzu-prestazioak egin ohi diren unearen aurreko likidazio-aldietan zergadunak tributu-administrazio baten ordainarazpen-eskumenaren mendean egon badira eta beste administrazio baten mendean ondoko likidazio-aldietan, edo baldin eta likidazio-aldi horietan tributuen ordainketaren proportzioa nabarmen aldatu bada administrazio bati edo besteari –erkidea edo forala– ordaintzean, itzulitako kuoten erregularizazioa egingo da, apartatu honetan agindutako eran.

Aurreko paragrafoak hizpide dituen zergadunek beren jarduerari dagozkion ondasun-emateak edo zerbitzu-prestazioak egiten hasi aurreko likidazio-aldiei dagozkien administrazioetako tributazio-proportzioak erregularizatu beharko dituzte, beren jarduerari dagozkion ondasun-emate edo zerbitzu-prestazio horiek egin ohi diren unearen ondoko lehenengo egutegiko urte osoari dagozkion banan-banako tributazio-ehunekoaren arabera.

Horretarako, aitorpen espezifiko bat aurkeztu beharko dute subjektu pasiboek erregularizazioak ukitzen dituen administrazio guztien aurrean, beren jarduerari dagozkion ondasun-emate edo zerbitzu-prestazio horiek egin ohi diren unearen ondoko lehenengo egutegiko urte osoaren azken aitorpen-likidazio aurkezteko dagoen epe berean.

Honela, administrazioek beren gain hartu beharko dute beren jarduerari dagozkion ondasun-emateak edo zerbitzu-prestazioak egiten hasi aurreko likidazio-aldiei dagozkien kuoten itzulketak, bigarren paragrafoan ezarritako proportzioaren arabera; horren ondorioz, beharrezkoak diren zenbatekoen arteko konpentsazioak egingo dira, baina erregularizazio honek ez du inola ondorio ekonomikorik izango zergadunentzat.

Ondorio horietarako, apartatu honen lehenengo paragrafoak hizpide dituen likidazio-aldietan tributuen ordainketaren proportzioa administrazio batetik bestera —erkidego edo forala— nabarmen aldatu dela ulertuko da baldin eta administrazioetariko bati dagokion proportzioak % 40 gora edo behera, gutxienez, egiten badu.

8. ATALA

ONDARE ESQUALDAKETA ETA EGINTZA JURIDIKO DOKUMENTATUEN GAINEKO ZERGA

30. artikulua. Aplikatu beharreko arautegia.

Ondare Eskualdaketa eta Egintza Juridiko Dokumentatuen gaineko Zerga itundutako zerga da eta araudi autonomoaren pean dago, sozietate-eragiketetan, truke-letretan eta ordeztako balioa edo igorpen-zeregina duten agirietan izan ezik; halakoetan arau erkideak beteko dira eta lurralde historikoetako erakunde eskudunen eginkizuna izango da aitortpen eta sarrera agirien ereduak onestea eta sarrera egiteko epeak jartzea likidazio-aldi bakoitzean. Dena dela, horiek guztiek ez dute alde handirik izango Estatuko Administrazioak ezartzen dituenekin.

31. artikulua. Zergaren ordainarazpena.

Ondare-eskualdaketa eta egintza juridiko dokumentatuen gaineko zerga ordainaraztea dena delako foru-aldundiari dagokio honako kasu hauetan:

1. Ondasun higiezinak kostu bidez eskualdatzen direnean eta haien errentamenduetan, eta ondasun horien eskubide errealak —baita bermekoak ere— osatu edo eskubide horiek kostu bidez ematerakoan, ondasunok Euskadiko lurraldean kokatuta badaude.

Balore Merkatuaren Legearen testuategina onartzen duen urriaren 23ko 4/2015 Legegintzako Errege Dekretuko 314. artikuluan jasotako kasuetan, baloreak eskualdatzen dituen erakundearen aktiboko ondasun higiezinak Euskadiko lurraldean badaude.

2. Ondasun higigarriak, azienak eta kredituak kostu bidez eskualdatzerakoan eta horien gaineko eskubideak osatzerakoan eta eskubide horiek kostu bidez lagatzerakoan, baldin eta eskuratu behar dituen pertsona fisikoa bada eta ohiko bizilekua Euskadin badauka; edo, pertsona juridikoa bada eta Euskadin badauka egoitza fiskala.

Aurrekoa hala bada ere, honako bi salbuespen hauek jarri dira:

- a) Akzioak, harpidetza-eskubideak, obligazioak, antzeko tituluak eta gainerako baloreak eta sozietateen partaidetzak eskualdatzen direnean, eragiketa zein tokitan formalizatu den hartuko da kontuan.
 - b) Ondasun higigarrien gaineko hipoteka edo lekualdaketa gabeko bahia osatzerakoan edo tartean ontzi handi, itsasontzi txiki edo aireontziak dauden kasuetan, egintza horiek zein lurraldetan inskribatu behar diren hartuko da kontuan.
3. Mailegu soilak, fidantzak, higiezinak bestelako errentamenduak eta pentsioak osatzen direnean, baldin eta mailegu-hartzailea, fidantza-hartzailea, errentaria edo pentsioduna pertsona fisikoa bada eta ohiko bizilekua Euskadin bada; edo pertsona juridikoa bada eta egoitza fiskala Euskadin bada.

Maileguak berme errealak duenean, berriz, hipotekadun ondasun higiezinak Euskadiko lurraldean badaude, edo lurralde horretan inskribatu badaitezke higigarrien hipotekak edo eskualdaketa gabeko bahiak.

Mailegu bat lurralde erkidean eta foru-lurraldean kokatutako hainbat ondasun higiezin gaineko hipotekarekin bermatuta badago, edo lurralde bietan inskribatu daitekeen higigarrien hipotekarekin nahiz eskualdaketa gabeko bahiarekin bermatuta badago, batzuei eta besteei egozten zaien erantzukizunaren arabera proportzioan ordainduko

zaio tributua administrazio bakoitzari, eta, zehaztapen hori eskrituran beren-beregi jasorik ez badago, ondasunen balio egiaztatuen arabera proportzioan.

4. Ondasunen administrazio-emakidetan, ondasun horiek Euskadin kokatuta baldin badaude; eta obrak burutu edo zerbitzuak ustiatu behar direnetan, baldin eta Euskadin egiten edo eskaintzen badira. Arau horiek beroriek aplikatuko dira administrazio-emakidekin berdinesten direlako zergapean dauden administrazio egintza eta negoziioetan ere.

Euskadiko lurralde-eremua gainditzen duten ondasunak ustiatzeko emakidak direnean, Euskadiko lurraldean okupatzen duten azaleraren arabera eskatuko da zerga.

Euskadiko lurralde-eremua gainditzen duten obrak burutzeko emakidak direnean, Euskadiko lurraldean egingo diren obren zenbatekoa kalkulatu da eta horren arabera eskatuko da zerga.

Euskadiko lurralde-eremua gainditzen duten zerbitzuak ustiatzeko emakidak direnean, ukitutako erkidegoen guztizkoaren gainean Euskadiko biztanleriak eta azalerak dauzkaten ehunekoen batez besteko aritmetikoaren arabera eskatuko da zerga.

Euskadiko lurralde-eremua gainditzen duten emakida mistoak badira, aurreko hiru paragrafoetan jasotako irizpideak emakida-zatiari aplikatuta eskatuko da zerga.

Euskadiko lurralde-eremua gainditzen duten administrazio-emakidak badira, lurraldearen arabera eskumena duen foru-aldundiak ikuskatuko du zerga, baldin eta erakunde emakidadunaren egoitza fiskala bertan badago.

5. Sozietate-eragiketetan, honako gorabeheretako bat nabari bada:
 - a) Erakundeak egoitza fiskala Euskadin eduki behar du.
 - b) Erakundeak egoitza soziala Euskadin eduki behar du, baldin eta benetako zuzendaritza-egoitza Europar Batasuneko kide diren estatuetakoren bateko beste tributuan administrazio bateko lurralde-esparruan ez badago; edo, hala egonik ere, estatu horrek ez baldin badu sozietate-eragiketa antzeko beste zergaren batekin kargatzen.
 - c) Erakundeak eragiketa batzuk Euskadin ere egin behar ditu, baldin eta benetako zuzendaritza-egoitza eta egoitza soziala Europar Batasuneko kide diren estatuetakoren bateko beste tributuan administrazio bateko lurralde-esparruan ez badago; edo, hala egonik ere, estatu horrek ez baldin badu sozietate-eragiketa antzeko beste zergaren batekin kargatzen.
6. Notarioen eskritura, akta eta testigantzetan, baldin Euskadiko lurraldean baimendu edo ematen badituzte.

Aurreko paragrafoan jartzen duena bete egin behar bada ere, egintza juridiko dokumentatuen gaineko karga-kuota gradualari lotuta dauden kasuetan, baldin eta ondasunak edo egintzak inskribatu behar diren edo haien idatzoharra egin behar den erregistroa Euskadiko lurraldean badago.
7. Truke-letretan eta haien ordezkotako balioa edo igorpen-zeregina duten agirietan eta ordaindukoetan, bonoetan, obligazioetan eta antzeko tituluetan, Euskadin igortzen edo jaulkitzen badira; atzerrian igortzen badira, lehenengoz eduki dituenak ohiko bizilekua edo egoitza fiskala Euskadiko lurraldean baldin badauka.
8. Prebentziozko idatzoharretan, Euskadin kokatutako erregistro publikoetan egiten badira.

9. ATALA ASEGURU SARIEN GAINEKO ZERGA.

32. artikulua. Aplikatu beharreko arautegia eta zergaren ordainarazpena.

Bat. Aseguru Sarien gaineko Zerga itundutako zerga da eta Estatuak une bakoitzean ezarrita dituen funtsezko eta formazko arau berberak erabiliko dira hura eraentzeko.

Nolanahi ere, lurralde historikoetako erakunde eskudunek aitorpenak eta sarrerak egiteko ereduak onetsi ahal izango dituzte, baina eredu horietan lurralde erkideko ereduak datu berberak jasoko dira, gutxienez; eta sarrerak egiteko epeak jarri ahal izango dituzte likidazio-aldi bakoitzerako, baina epe horiek ez dute alde handirik izango Estatu Administrazioak ezartzen dituenekin.

Bi. Foru aldundiek ordainaraziko dute Zerga baldin eta arriskua edo konpromisoa, aseguru eta kapitalizazio eragiketetan, Euskadiko lurraldean kokatzen bada.

Hiru. Hori dela eta, arriskua Euskadiko lurraldean kokatuta dagoela uste izango da hurrengo baldintzak betetzen direnean:

Lehenengo. Asegurua higieinei badagokie, ondasun higiezinak Euskadiko lurraldean egotea. Arau bera erabiliko da aseguru higieinei eta horien edukiari dagokienean, baldin eta aseguru poliza batek berak estaltzen baditu higiezinak eta edukia. Aseguru higiezinan dauden ondasun higikorrei soilik badagokie, berriz (merkataritzako igarobidean dauden ondasunak izan ezik), ondasun higikorrek barruan dituen higiezin hori Euskadiko lurraldean egotea.

Aseguru batek berak estaltzen baditu lurralde erkidean eta Euskadiko lurraldean dauden higiezinak, lurralde bietako batean kokatuko da, lurralde bakoitzean kokatutako higiezinaren balioa kontuan hartuta.

Bigarren. Aseguru edozein ibilgailu motari badagokio, ibilgailua bere izenean matrikulatuta daukan pertsonak edo erakundeak ohiko egoitza edo zerga-egoitza Euskadin edukitzea..

Hirugarren. Aseguru bidaietan edo aseguru-hartzailearen ohiko egoitzatik kanpo gerta litezkeen ezbeharrei badagokie, eta haren iraupena gehenez lau hilabetekoa bada, aseguru-hartzaileak Euskadiko lurraldean sinatzea aseguru-kontratua.

Laugarren. Aurreko arauetan berariaz azaldu gabeko kasu guztietarako: aseguru-hartzailea pertsona fisikoa bada, beraren ohiko egoitza Euskadiko lurraldean egotea; eta bestela, kontratuan ageri den sozietatearen egoitza edo sukurtsala Euskadiko lurraldean egotea.

Lau. Konpromisoa Euskadiko lurraldean kokatutzat joko da baldin eta, bizitza aseguruari dagokienez, aseguruaren kontratatzaileak lurralde horretan badu ohiko egoitza, pertsona fisikoa izanez gero, edo sukurtsalen bat (kontratua berari dagokiolarik) edo sozietate-egoitza, pertsona juridikoa izanez gero.

Bost. Aurreko zenbakietan kokaerari buruzko berariazko araurik egon ezik, aseguru eta kapitalizazio eragiketak Euskadiko lurraldean eginak direla uste izango da baldintza hauek betetzen direnean: kontratatzailea enpresari edo profesionala izatea; bere eragiketak bere enpresa edo lanbide jardueretan ari denean hitzartzea; eta bere ekonomi jardueraren egoitza Euskadiko lurraldean edukitzea, edo establezimendu iraunkorren bat edukitzea lurralde horretan, edo bestela, egoitza bertan edukitzea.

10. ATALA ZERGA BEREZIAK

33. artikulua. Aplikatu beharreko arauak eta zergen ordainarazpena.

Bat. Zerga bereziak tributu itunduak dira eta Estatuak une bakoitzean ezarrita dituen edukizko eta formazko arau berberak erabiliko dira horiek eraentzeko.

Aurrekoa bete beharrekoa izango bada ere, lurralde historikoetako erakunde eskudunek zerga hauen karga-tasak ezar ditzakete, lurralde erkidean unean-unean indarrean dauden arauak ezarritako mugen eta baldintzen barruan.

Lurralde historikoetako erakunde eskudunek, halaber, aitorten- eta sarrera-ereduak onesteko eta likidazio-aldi bakoitzeko sarrera-epeak zehazteko gaitasuna izango dute. Baina eredu horietako datuak, gutxienez, lurralde erkidean erabiltzen diren berberak izan behar dira; eta epe horiek, berriz, ez dira Estatuako Administrazioak ezarritakoez oso bestelakoak izango.

Bi. Fabrikazio-zerga bereziak foru-aldundiak eskatuko dituzte, zerga horien sortzapena Euskadin sortzen baldin bada.

Kuota eskuratu duen administrazioaren eginkizuna izango da fabrikazio-zerga bereziak itzultzea, eskatzen zaizkionean. Dena dela, ezin baldin bada jakin kuotak zein administrazioan sartu ziren, itzultzeko eskubidea duenaren lurraldeko administrazioak itzuli beharko ditu. Euskadin dauden establezimenduak kontrolatzea eta horiei baimena ematea, araubidea edozein dela ere, kasuan kasuko foru-aldundiaren eginkizuna izango da. Dena dela, aurretik jakinarazpena egin beharko zaie Estatuako Administrazioari eta Araugintza Koordinatu eta Ebaluatzeako Batzordeari.

Hiru. Zenbait garraio bideren gaineko zerga berezia foru-aldundiak eskatuko dute, zerga-egitatea egiten duen pertsona fisiko edo juridikoaren egoitza fiskala Euskadiko lurraldean badago.

Bat apartatuan xedatutakoa gorabehera, lurralde historikoetako erakunde eskudunek karga-tasak handitu ahal izango dituzte, Estatuak une bakoitzean ezarrita dituen tasak oinarri hartuta, % 15, gehienez.

Lau. Ikatzen gaineko zerga berezia foru-aldundiak eskatuko dute, zerga horren sortzapena Euskadin baldin bada.

Kontsumo edo autokontsumorako jartzen den unean joko da sortzapena gertatu dela.

Kontsumorako jarri dela joko da sortu, erauzi, inportatu edo komunitate barnean eskuratu ondoren lehen salmenta edo entrega gertatzen denean.

Era berean, lehen salmentaren edo entregaren parekoa izango da enpresariak ikatza berriz saltzea, eskuratzeko orduan berriz saltzeko salbuespena aplikatu zaienean.

Autokontsumotzat hartuko da aurreko paragrafoan aipatzen diren enpresariak, Europar Batasuneko erosleak, inportatzaileak, erauzleak edo ekoizleak ikatza erabiltzea edo kontsumitzea.

Bost. Lurraldea dela-eta eskumena daukan foru-aldundiak ordainaraziko du elektrizitatearen gaineko zerga berezia, honako kasu hauetan:

Energia elektrikoaren horniduraren kasuan, elektrizitatea bere kontsumorako eskuratzen duen pertsona edo erakundearen hornidura-puntua Euskadin badago.

Energia elektrikoaren ekoizleak eurek sortutako elektrizitatea kontsumitzen dutenean, kontsumo hori Euskadin gertatzen bada.

11. ATALA

BEROTEGI-EFEKTUA DUTEN GAS FLUORATUEN GAINEKO ZERGA

34. artikulua. Aplikatu beharreko arauak eta Zergaren ordainarazpena.

Bat. Berotegi-efektua duten gas fluoratuen gaineko Zerga itundutako tributua da, eta Estatuak une bakoitzean ezarrita dituen funtsezko eta formazko arauak erabiliko dira hura eraentzeko.

Nolanahi ere, lurralde historikoetako erakunde eskudunek aitorpenak eta sarrerak egiteko ereduak onetsi ahal izango dituzte, baina eredu horietan lurralde erkideko ereduetao datu berberak jasoko dira, gutxienez; eta sarrerak egiteko epeak jarri ahal izango dituzte likidazio-aldi bakoitzerako, baina epe horiek ez dute alde handirik izango Estatuako Administrazioak ezartzen dituenekin.

Bi. Zergaren ordainarazpena Estatuako Administrazioari edo lurraldea dela-eta eskumena daukan foru-aldundiari egokituko zaio, zergaren xede diren produktuen azken erabiltzaileek produktuok erabiltzen dituzten instalazio, ekipo edo aparatuak lurralde erkidean ala euskal lurraldean kokatuta egotearen arabera.

Berotegi-efektua duten gas fluoratuak autokontsumorako badira, Zergaren ordainarazpena Estatuako Administrazioari edo autokontsumoa gertatzen den lurraldea dela-eta eskumena daukan foru-aldundiari egokituko zaio.

Aurreko lerroaldeetan jasotzen ez diren kasuetan, Zergaren ordainarazpena zerga-egitatea gertatzen den establezimendua —zergadunaren establezimendua, alegia— kokatuta dagoen administrazioari egokituko zaio.

Hiru. Egin beharreko itzulketak itzultzeko eskatzen den kuota sartu zen Administrazioak egin beharko ditu, zenbateko horren mugarekin.

12. ATALA

ZEHARKAKO BESTE ZERGA BATZUK

35. artikulua. Aplikatu beharreko arautegia.

Zeharkako gainerako zergei dagokienez, Estatuak unean unean ezarrita dituen oinarritzko abiaburu, arau substantibo, zerga-egitate, salbuespen, sortzapen, oinarri, tasa, tarifa eta kenkariak eurak izango dira manuzkoak.

13. ATALA

JOKOAREN GAINEKO ZERGA

36. artikulua. Joko-jardueren gaineko zerga.

Bat. Joko-jardueren gaineko zerga tributu itundu bat da eta Estatuak une bakoitzean ezarrita dituen edukizko eta formazko arau berberak erabiliko dira hura eraentzeko.

Nolanahi ere, zergak kargatutako jardueri dagokien informazio guztia jasoko dute zergaren subjektu pasiboek esku hartzen duten administrazioen aurrean aurkeztu beharreko eredueta.

Hala ere, zergaren bidez kargatutako jarduera gauzatzen duten operadoreek, antolatzaileek edo hura garatzen duten bestelakoek egoitza fiskala Euskadin dutenean, lurralde historikoetako erakunde eskudunek ezarritako zerga-tasak handitu ahalko dituzte, gehienez ere % 20, oinarri gisa Estatuak ezarritako tasak hartuta. Gehikuntza hori bakar-bakarrik aplikatuko da Euskadiko lurraldean egoitza fiskala dutenek jokoan izandako partaidetzari dagokion zerga-oinarriaren zati proportzionalaren gainean.

Lurralde historikoetako erakunde eskudunek, halaber, aitorpen- eta sarrera-ereduak onesteko eta likidazio-aldi bakoitzeko sarrera-epeak zehazteko gaitasuna izango dute. Baina eredu

horietako datuak, gutxienez, lurralde erkidean erabiltzen diren berberak izan behar dira; eta epe horiek, berriz, ez dira Estatuko Administrazioak ezarritakoez oso bestelakoak izango.

Bi. Subjektu pasiboek, egoitza fiskala edozein lekutan dutela ere, ekitaldiaren barruan lurralde bakoitzean egindako eragiketen bolumenaren proportzioan ordainduko diete zerga foru-aldundiei, Estatuko Administrazioari edo biei.

Ekitaldian lurralde bakoitzean egindako eragiketa-bolumenaren proportzioa Euskadin eta lurralde erkidean bizi diren jokalariek joko-modalitate bakoitzean jokaturako zenbatekoen pisu erlatiboaren arabera zehaztuko da. Proportzio hori ehunekoetan emango da, bi dezimalekin biribilduta, eta berdin aplikatuko zaie Espainian bizi ez diren jokalarien kuotei.

Jokalariaren bizilekua zehazterik ez dagoen joko-modalitateen ondorioz likidatutako kuotak kasuan kasuko foru-aldundiari edo Estatuko Administrazioari, batari edo besteari, egotziko zaizkio, subjektu pasiboaren egoitza fiskala non dagoen, eta administrazioen artean beharrezkoak diren konpentsazioak geroago eragotzi gabe.

Aurreko paragrafoetan xedatutakoa gorabehera, kirol eta ongintzako elkarrekiko apustuak eta Estatuko hipika-apustuak egitearen ondoriozko zergaren ordainarazpena, jokalariaren bizilekua zehazterik ez badago, Estatuko Administrazioak edo foru-aldundi eskudunak egin beharko du, apustua egiten den salmenta-puntua lurralde erkidean edo Euskadiko lurraldean dagoen kontuan hartuta.

Hiru. Subjektu pasiboek zergaren aitorpen-likidazioak aurkeztuko dizkiete zerga ordainarazteko eskumena daukaten administrazioei. Aitorpen-likidazio horietan, aplikatu beharreko proportzioak eta administrazioetako bakoitzari dagozkion kuotak jaso beharko dira beti.

Lau. Dagozkion itzulketak egitea administrazioen lana izango da, bakoitzari dagokion zenbatekoan.

Bost. Subjektu pasiboaren egoitza fiskala edo haren ordezkariena –egoiliarrak ez diren subjektu pasiboaren kasuan– kokatuta dagoen administrazioaren organoek egingo dute subjektu pasiboaren ikuskapena, dagozkien gainerako tributu-administrazioen lankidetzaz baztertu gabe, eta ondorioak izango ditu eskudun diren administrazio guztien aurrean, haiei dagokien tributazio-proportzioa barne.

Nolanahi ere, Estatuko Administrazioari dagokio egoitza fiskala Euskadiko lurraldean duten subjektu pasiboaren ikuskapena, baldin eta aurreko urtean, jokaturako kopuruen zenbateko erantsia 7 milioi eurotik gorakoa bada eta lurralde erkidean egindako horien proportzioa, Bi apartatuan zehaztutako lotura-puntuen arabera, gutxienez % 75ekoa edo gehiagokoa bada.

Halaber, lurraldearen arabera eskuduna den aldundiaren organoek egoitza fiskala lurralde erkidean duten subjektu pasiboaren ikuskapena, baldin eta aurreko urtean jokaturako kopuruen zenbateko erantsia 7 milioi eurotik gorakoa bada eta, aurreko Bi apartatuan zehaztutako lotura-puntuen arabera eragiketa guztiak Euskadiko lurraldean egin badira.

Ikuskapen-lan horien ondorioz, zorren bat jaso edo kopururen bat itzuli behar dela agertzen bada, eta zor edo kopuru hori bi administrazioei badagokie, ikuskapen-lan horiek egin dituen administrazioak kobratu edo itzuliko du. Dagozkion konpentsazioak gero emango dizkiote bata besteari, beharrezkoa bada.

Eskumena daukan administrazioeko organo ikuskatzaileek euren jardunaren emaitzen berri emango diete ukitutako gainerako administrazioei.

Apartatu honen aurreko paragrafoetan xedatutakoa bete egin behar bada ere, horrek ezin ditu zerga-administrazioei –nori bere lurralde barruan– egiaztapenak eta ikerketak egiteko dagozkien eskumenak murriztu. Baina, era berean, foru-aldundien jarduerak ezin dute, administrazio eskudunetako organoen jardueren ondorioz egindako behin betiko likidazioen inguruan, zergadunen artean inongo ondorio ekonomikorik izan.

Administrazio eskudunak egiaztapenetan ezarritako proportzioak subjektu pasiboak ere bete beharko ditu, likidatutako betebeharren inguruan. Horrek ez du esan nahi administrazio eskudunen artean behin betiko zehazten dituztenak bete behar ez direnik, hala ere.

37. artikulua. Jokoaren gaineko beste tributu batzuk.

Bat. Jokoaren gaineko beste tributuak itundutako tributuak dira, eta araudi autonomoa aplikatu behar zaie, baimena Euskadin eman behar zaien kasuetan. Estatuak unean-unean ezarrita duen arautegia aplikatuko da zerga-egitateari eta subjektu pasiboari dagokienez.

Bi. Lurraldearen arabera eskumena daukan foru-aldundiak ordainaraziko du Zori, Enbido eta Adur Jokoen gaineko Tasa, zerga-egitatea Euskadin egiten denean.

Hiru. Lurraldearen arabera eskumena daukan foru-aldundiak ordainaraziko du Zozketa, Tonbola, Apustu eta Ausazko Konbinazioen gaineko Zerga Tasa, halako jokoak egiteko baimena Euskadin eman behar den kasuetan.

14. ATALA TASAK

38. artikulua. Tasak ordainarazteko eskumena.

Foru aldundiei dagokie eska daitezkeen tasak ordainaraztea euren jabariko gune publikoen erabilera edo aprobetxamendu bereziagatik, zerbitzugintzagatik eta Zuzenbide publikoko araubidean foru aldundiek eurek egiten dituzten jarduerengatik.

15. ATALA TOKI OGASUNAK

39. artikulua. Ondasun Higiezinaren gaineko Zerga.

Ondasun Higiezinaren gaineko Zerga lurralde historikoetan eskumena duten erakundeek emandako arauen bidez arautuko da. Zerga horrek kasuan kasuko lurralde historikoan dauden landa-ondasun eta hiri-ondasunak zergapetuko ditu.

40. artikulua. Ekonomi Jardueren gaineko Zerga.

Bat. Ekonomi Jardueren gaineko Zerga lurralde historikoetan eskumena duten erakundeek emandako arauen bidez arautuko da.

Bi. Lurralde historikoetan aginpidea duten erakundeen eginkizuna izango da kasuan kasuko lurraldean aurrera eramandako jarduerengatik Ekonomi Jardueren gaineko Zerga ordainaraztea, ondorengo arauak beteta:

- a) Gutxienerako udal-kuotak direnean, edo gehitutakoak, kasuan kasuan, kuota horiek lurralde historikoko udalen alde sortzen direnean.
- b) Probintzia-kuotak direnean, kasuan kasuan, jarduera lurralde historikoan burutzen baldin bada.
- c) Probintzia batean baino gehiagotan jarduteko aukera eskaintzen duten kuotak baldin badira, kasuan kasuan, subjektu pasiboak ohiko bizilekua edo zerga-egoitza Euskadin baldin badu, egoeraren arabera. Kuota hori lurralde erkideko edo foru lurraldeko administrazioari ordaindu ondoren, jarduera bi lurraldeetan eraman ahal izango da aurrera.

41. artikulua. Trakzio Mekanikoko Ibilgailuen gaineko Zerga.

Trakzio Mekanikoko Ibilgailuen gaineko Zerga lurralde historikoetan eskumena duten erakundeek emandako arauen bidez arautuko da, zirkulazio-baimenean ageri den egoitza lurralde horretako udalerriren batekoa baldin bada.

42. artikulua. Beste toki-zerga batzuk.

Lurralde historikoetan aginpidea duten erakundeek toki-erakundeen gainerako zerga propioen araubidea mantendu, ezarri eta arautu ahal izango dute, bakoitzak bere lurraldearen barruan, ondoren aipatzen diren irizpideak beteta:

- a) Araubide erkideko tokiko zerga-sistemarentzako ezarritako egitura orokorra eta egitura horren printzipioak kontuan izatea, 3. artikuluan aurreikusitako harmonizazio-arauak (gai honetan ezartzekoak direnak) errespetatuta.
- b) Araubide erkidekoen gainera, zeharkako bestelako zerga-modurik ez ezartzea, zerga-modu horien etekina Euskadiko lurraldetik kanpora beste batengan isla badaiteke edo eragina izan bidezake.

16. ATALA KUDEAKETA ETA JARDUNBIDEKO ARAUAK

43. artikulua. Ohiko bizilekua eta zerga-egoitza.

Bat. Ekonomia-itun honetan xedatutakoari begira, Euskadin bizi izaten diren pertsona fisikoek ohiko bizilekua Euskadin dutela pentsatzeko, ondoren aipatzen diren arauak aplikatuko dira, hurrenez hurren:

Lehenengo. Lurralde horretan zergaldiko egun gehien ematea, Pertsona Fisikoen Errentaren gaineko Zergari dagokionez; sortzapen egunaren bezperan amaitzen den urtebeteko egun gehien ematea, urtearen edozein egunetatik hasita zenbatuta, Oinordetza eta Dohaintzen gaineko Zergari, Ondare Eskualdaketen eta Egintza Juridiko Dokumentatuen gaineko Zergari eta Zenbait Garraiobideren gaineko Zerga Bereziari dagokienez.

Pertsona fisikoen ohiko bizilekua, gainerako tributuei dagokienez, dena delako tributuaeren sortzapen-egunean Pertsona Fisikoen Errentaren gaineko Zergaren ondoretarako duten ohiko egoitza bera izango da.

Lurralde jakin batean pertsona batek zenbat denbora eman duen zehazteko, aldi batez kanpoan izandako denbora hartuko da kontuan.

Kontrako frogarik ez dagoen artean, pertsona fisiko bat Euskadiko lurraldean dagoela pentsatuko da bere ohiko etxebizitza bertan baldin badu.

Bigarren. Lurralde horretan baldin badu bere eginkizunen zentro nagusia; leku hori zein den jakiteko, Pertsona Fisikoen Errentaren gaineko Zergaren zerga-oinarriaren zatirik handiena zein lurraldetan eskuratzen duen ikusiko da; kasu honetarako, ez dira kontuan hartuko higitarren kapitalak emandako errentak eta ondare-gehikuntzak, ez eta zerga-gardentasunaren araubidean —profesionala alde batera utzita— egotzitako oinarriak ere.

Hirugarren. Lurralde horretan baldin badu aitortutako bere azken bizilekua, Pertsona Fisikoen Errentaren gaineko Zergaren ondorioetarako.

Bi. Espainiako lurraldean bizi diren pertsona fisikoen kasuan, egutegiko urtean zehar ez badute lurralde horretan ehun eta laurogeita hiru egun baino gehiago egiten, Euskadiko lurraldean bizi direla joko da bertan baldin badute enpresa- edo lan-jardueren edo interes ekonomikoen gune nagusia edo oinarria.

Hiru. Dena delako pertsona fisikoa Espainian bizi dela uste baldin bada, ezkontidearekin legez banandu gabe dagoelako eta ezkontideak eta haren mende dauden adin txikiko seme-alabek ohiko bizilekua Euskadiko lurraldean dutelako, pertsona fisiko horrek ohiko bizilekua Euskadiko lurraldean daukala joko da.

Lau. Ekonomia-itun honen ondorioetarako, jarraian aipatuko direnek zerga-egoitza Euskadin dutela uste izango da:

- a) Ohiko bizilekua Euskadin duten pertsona fisikoak.
- b) Pertsona juridikoak eta Sozietateen gaineko Zergaren mendean dauden gainerako erakundeak, Euskadin baldin badute sozietate-egoitza eta, betiere, sozietate-egoitza horretan baldin badute zentralizatuta administrazio-kudeaketa eta negozioen zuzendaritza. Edo bestela, kudeaketa edo zuzendaritza hori Euskadin egiten bada.

Irizpide horiek erabilita bizilekua non duten jakiterik ez badago, ibilgetuaren baliorik handiena non daukaten hartuko da kontuan.

- c) Establezimendu iraunkorrak, Euskadin egiten badute euren negozioen administrazio-kudeaketa edo zuzendaritza. Irizpide hori erabilita bizilekua non duten jakiterik ez badago, ibilgetuaren baliorik handiena non daukaten hartuko da kontuan.
- d) Sozietate zibilak eta nortasun juridikorik gabeko izakiak, Euskadin baldin badute kudeaketa eta zuzendaritza. Irizpide hori erabilita zerga-egoitza non duten jakiterik ez badago, ibilgetuaren baliorik handiena zein lurraldetan duten hartuko da kontuan.

Bost. Sozietateen gaineko Zergaren subjektu pasiboek eta erakunde ez-egoiliarren establezimendu iraunkorrek zerga-egoitzaren aldaketak bi administrazioei jakinarazi behar dizkiete, baldin eta egoitzaren aldaketak honako zerga ordainarazteko eskumenean aldaketaren bat badakar. Pertsona Fisikoen Errentaren gaineko Zergari dagokionez, zergaren aitorpena aurkeztea nahikoa izango da jakinarazpen hori egiteko.

Sei. Zergapekoen egoitza zein den erabakitzeke orduan administrazioen artean auziak sortzen baldin badira, Arbitraje Batzordeak konponduko ditu arazoak, zergapekoek diotena entzun ondoren. Arbitraje Batzorde hori ekonomia-itun honen III. kapituluko 3. atalean dago araututa.

Zazpi. Lurralde erkidean edo foru-lurraldean bizi diren pertsona fisikoek beren ohiko bizilekua lurralde horietako batetik bestera aldatzen baldin badute, tributu-betebeharrak bizileku berriaren arabera beteko dituzte aurrerantzean, bizileku berri hori lotura-puntua baldin bada.

Gainera, paragrafo honetan aurreikusitakoagatik bizilekurik ez dela aldatu pentsatu behar baldin bada, pertsona fisikoek kasuan kasuko aitorpen osagarriak aurkeztu beharko dituzte, eta atzerapenek sortarazitako korrituak ere gehitu beharko dituzte.

Bizilekua aldatzearen helburu nagusia tributu gutxiago ordaintzea baldin bada, aldaketa horiek ez dute ondorioz edukiko.

Bizileku berri jarraian emandako denbora gutxienez hiru urtez luzatzen den kasuetan izan ezik, Pertsona Fisikoen Errentaren gaineko Zergaren eta Ondarearen gaineko Zergaren ondorioetarako, aldaketarik ez dela izan pentsatuko da honako inguruabar hauek gertatzen direnean:

- a) Bizilekua aldatzen den urtean edo hurrengoan, Pertsona Fisikoen Errentaren gaineko Zergaren zerga-oinarria aldaketaren aurreko urtean izandako zerga-oinarria baino 100eko 50 handiagoa izatea, gutxienez. Tributu-ordainketa batera egiten denean, banakotzeari buruzko arauak erabiliz zehaztuko da.

- b) Egoera hori sortzen den urtean, Pertsona Fisikoen Errentaren gaineko Zergaren ondoriozko tributazio efektiboa aldaketa izan aurreko lurraldean aplikatu beharreko araudiarekin gertatuko litzatekeen tributazio efektiboa baino txikiagoa izatea.
- c) Ohiko bizilekua berriz ere hasierako lurraldean edukitzea a) letran azaldutako egoera sortzen den urtearen hurrengoan, edo horren hurrengoan.

Zortzi. Kontrako frogarik egon ezik, pertsona juridikoen zerga- egoitza ez dela aldatu ulertuko da baldin eta aldaketaren aurreko edo ondoko urtean batere jarduerarik egiten ez badute edo jarduerari uzten badiote.

Bederatzi. Administrazio interesatuetatik edozeinek zergadunaren egoitza aldaketa eragin ahal izango du. Administrazio horrek bere proposamena besteari helaraziko dio, jakin beharreko aurrekariak erantsita, eta lau hilabeteko epea emango dio egoitza aldaketari buruz duen iritzia azaltzeko eta ondoreak zein egunetatik sortuko diren adierazteko. Bestek proposamenari baietza ematen badio, administrazio eskudunak zergadunari jakinaraziko dio.

Bi administrazioak ados jartzen ez badira ere, prozeduran aurrera jarraitu ahal izango da artikulua honetako sei paragrafoan azaldutako eran.

Egoitza-aldaketarako proposamena bidali aurretik, Administrazio interesdunak zerga-egoitza erroldan egiaztatuzeko jarduketak egin ditzake, beste Administrazioarekin lankidetzan.

Egoitza ofizios aldatzen denean, Administrazio bien arteko akordio baten edo Arbitraje Batzordearen ebazpen baten ondorioz, uste izango da, kontrakoaren frogarik ezean, hala zehaztutako zergaegoitza mantendu egingo dela ebazpena hartzen den egunaren osteko hiru urteetan.

44. artikulua. Delitu fiskala.

Tributu-administrazioak uste baldin badu arau-haustek Ogasun Publikoaren aurkako delituak izan daitezkeela, eskumena duen jurisdikzioari bidaliko dio erruduntasun-testigantza, Zigor Kodean xedatutakoaren arabera.

Zigor Kodearen 305.5 artikuluari jarraituz tributuzko zorra zehazteko eta kobratzeko jarduketek aurrera egin badezakete, ikuskapena egiteko eskumena duen administrazioak jardungo du, ekonomia-itun honetan xedatutakoaren arabera dagokion tributuzko araudia aplikatuz.

Zigor Kodearen 305.7 artikuluari jarraituz epaileak edo epaitegiak tributuzko administrazioaren zerbitzuen laguntza eskatu behar dutenean delituaren eta isunaren ondoriozko erantzukizun zibila ordainarazteko, itun honen arabera eskuduna den tributuzko administrazioak emango du laguntza hori.

Artikulu honetan xedatutakoak ez du eragotziko, beharrezkoa bada, administrazioek batako besteari konpentsazioak ematea.

45. artikulua. Finantza-erakundearen lankidetzaren tributuzko kudeaketan, eta tributuzko ikuskatzailetzaren jarduketak.

Bat. Euskadiko foru-aldundien eskumenekoak diren tributuzko ordainarazteak dela eta, haien eginkizuna izango da bankako trafikoan edo kredituzko trafikoan diharduten finantza-erakundearen eta pertsona fisiko eta juridikoen kontuak eta eragiketak, aktiboak zein pasiboak, tributuzko arloan ikertzea.

Bi. Ekonomia-itun honek Euskadiko foru-aldundiei emandako eskumenak direla eta, datuen bat egiaztatuzko edo ikertzeko Euskadiko lurraldetik kanpora jarduketaren bat egin behar baldin bada, eginkizun hori Estatuko organo eskudunek eramango dute aurrera, edo lurraldearen arabera eskumena duen autonomia-erkidegoko ikuskatzailetzak berari lagutako tributuzko buruz bada, foru-aldundietan aginpidea duen organoak hala eskatzen dienean. Jarduketa horiek direla eta, Estatuko Administrazioak eta foru-aldundiek beharrezkoak diren lankidetzarako eta

elkarlanerako hitzarmenak adostuko dituzte, ekonomia-itun honen 4. artikuluan xedatutakoari jarraituz jarduketok koordinatzeko.

Hiru. Foru-aldundietako organo eskudunek egingo dituzte foru-aldundien eskumeneoak diren tributua ordainarazteko informazioa eskuratzeko jarduketak, ezertan ere eragotzi gabe ekonomia-itun honen 4. artikuluan xedatutakoari jarraituz jarduketok koordinatzeko egin daitezkeen lankidetzarako eta elkarlanerako hitzarmenak.

Lau. Estatuko edo autonomia-erkidegoetako edo foru-aldundietako organo eskudunek, egiaztatzeko edo ikertzeko jarduketan ondorioz edo tributua ordainarazteko informazioa eskuratzeko jarduketan ondorioz, beste administrazioan tributuen arloan eragina duten gertakarien berri izaten baldin badute, horren berri emango diote bata besteari, araz zehaztuko den moduan.

46. artikulua. Informatu beharra.

Bat. Egiten diren atxikipenen eta konturako sarreraren laburpenak berauetan jaso behar diren atxikipenak eta konturako sarrerak ordainarazteko eskumena daukan administrazioari aurkeztu behar zaizkio, administrazio bakoitzaren arautegia betez.

Balore-errenten gordailuzainak edo haien kobrantzaren kudeatzaileak diren erakundeek, baldin eta, aplikatu beharreko arautegiaren arabera, errenta horiek direla-eta atxikipenen eta konturako sarreraren urteko laburpena aurkeztu beharra badute, halako erakundeak egiaztatu eta ikertzeko eskumena daukan Administrazioari aurkeztu beharko dizkiote laburpenok, bakoitzari dagokion arautegia betez.

Estatuak eta foru-aldundiak eska dezaketen Sozietateen gaineko Zergaren subjektu pasiboak diren erakundeek atxikipenen eta konturako sarreraren urteko laburpenak aurkeztu behar dituzte —ekonomia- itun honetako 7.Bat.c) eta 9.Bat.Lehenengoa.a) artikuluetan aipatutako etekinei dagozkienean—, eta kasuan kasu Zerga ordainarazteko eskumena daukan administrazioak aitorpenak aurkezteko lekuari, erari eta epeari buruz ezartzen dituen arauak betez. Administrazio bakoitzari aurkeztutako laburpen horietan etekin guztiak eta haiei dagozkien atxikipen guztiak jaso behar dituzte.

Bi. Tributu-informazioa orokorrean emateko betebeharrak betetzeko diren legez eskatutako aitorpenak Estatuko Administrazioari edo lurraldearen arabera eskumena daukan foru-aldundiari aurkeztu behar zaizkio, irizpide hauek kontuan harturik:

- a) Zergadunek ekonomia-jarduerak egiten badituzte, eurek egiten dituzten enpresa- edo lanbide-jarduerak egiaztatu eta ikertzeko eskumena daukan administrazioari.
- b) Zergadunek ez badute ekonomia-jarduerarik egiten, zerga- egoitza non daukaten hartu behar dute kontuan, lurralde erkidean edo foru-lurraldean.

Aurreko letretan ezartzen denari dagokionez, jaraunspen jasogabeen, ondasun-erkidegoen edo nortasun juridikorik gabeko gainerako erakundeen kasuan, kasuan kasuko erakundeko kide edo partaideek zerga-egoitza duten administrazioari ere aurkeztu behar zaizkio aitorpen horiek.

Hiru. Zentsu-aitorpenak, bestalde, egin behar dituen pertsonak edo erakundeak bere zerga-egoitzako administrazioari aurkeztu behar zaizkio, bakoitzaren arautegiaren arabera; baita pertsona edo erakunde horrek, ekonomia-itun honetan ezarritako arauen indarrez, honako aitorpenen bat aurkeztu behar dion administrazioari ere:

- Atxikipenen eta konturako sarreraren aitorpena.
- Sozietateen gaineko Zergaren ziozko aitorpen-likidazioa.
- Balio Erantsiaren gaineko Zergaren ziozko aitorpen-likidazioa.
- Ekonomia-jardueren gaineko Zergaren ziozko aitorpena.

47. artikulua. Enpresak batzea eta zatitzea.

Enpresak batzeko eta zatitzeko eragiketetan, aurreko 14. artikuluan aipatzen diren zerga-irizpideei jarraituta, kasuan kasuko zerga-onurak bi administrazioek onetsi behar baldin badituzte, foru aldundiek aplikatuko duten araudia une bakoitzean lurralde erkidean indarrean egongo denaren berdina izango da, eta kasuan kasuko administrazio-espedienteak izapidetuko dira administrazio bakoitzean.

47. bis artikulua. Identifikazio fiskaleko zenbakia esleitzea eta ezeztatzea.

Pertsona juridikoek eta nortasunik gabeko erakundeek beren egoitza fiskalari dagokion administrazioaren aurrean eskatu beharko dute identifikazio fiskaleko zenbakia eslei diezaieten.

Establezimendu iraunkorrik ez duten erakunde ez-egoiliarrek tributuen izaera edo tributuen arloan eragina duten egintzak edo eragiketak egiten dituzten lurraldeko administrazioari eskatu behar diote eslei diezaien identifikazio fiskaleko zenbakia, salbu eta beste tributuo-administrazio batak aurrez identifikazio fiskaleko zenbakia esleitu badie.

Identifikazio fiskaleko zenbakia ezeztatzeko eskumena egoitza fiskaleko administrazioaren eskumena izango da, salbu eta egiaztapenak eta ikerketak egiteko eskumena beste administrazioaren bati esleituta badago, orduan azken horrena izango baita. Establezimendu iraunkorrik ez duten erakunde ez-egoiliarren kasuan, identifikazio fiskaleko zenbakia esleitu zuen administrazioarena izango da hura ezeztatzeko eskuduna.

Bi kasuotan, bi administrazioen arteko koordinazio egokia eta informazio-trukea bermatuko dira.

47. ter artikulua. Ordainarazpenak eta ikuskapenak egiteko eskumenen koordinazioa.

Bat. Ekonomia-itun honetako irizpideen arabera administrazio ezberdinei badagokie hurrengo Bi apartatuak hizpide dituen eragiketak erregularizatzeko ikuskapenak egiteko eskumena, ukitutako gainerako administrazioekin koordinatu beharko dituzte ordainarazpenak eta ikuskapenak egiteko beren eskumenak, artikulua honetan xedatutakoari jarraituz.

Bi. Eskumenen koordinazioa kasu hauetan gauzatuko da:

- a) Pertsonen arteko edo lotutako erakundeen arteko eragiketen erregularizazioa.
- b) Eragiketen kalifikazioa zergadunak deklaratu dituen moduz bestera egitea, baldin eta horren ondorioz zergak jasanarazteko mekanismoa ezarri den zeharkako zergetan jasandako edo jasanarazitako kuotak aldatzen badira.

Hiru. Aurreko apartatuak hizpide dituen kasuetan, haien inguruan eskumenak egikaritzen ari den administrazioak beharrezkotzat jotzen duen erregularizazioko egitatezko elementu eta zuzenbideko oinarriak jakinarazi beharko dizkie ukitutako beste administrazioei, zergadunarentzako ebazpen-proposamena egin baino lehen edo dagokion ikuskapen-akta formalizatu baino lehen.

Baldin eta bi hileko epean ukitutako beste administrazioek ez badute oharririk egiten ebazpen-proposamenaren gainean, proposamena onartutzat joko da eta administrazio horiek guztiak lotetsita geratuko dira zergadunen aurrean, irizpide horiek aplikatuko baitizkiete.

Oharririk badago, horien berri jakinaraziko zaio Araugintza Koordinatu eta Ebaluatzeako Batzordeari, eta batzorde horrek oharren gaineko akordioa lortu ahalko du.

Nolanahi ere, aipatutako oharrak egin eta bi hilabetera ez bada akordiorik lortu, bai Araugintza Koordinatu eta Ebaluatzeako Batzordeak, baita tartean dagoen beste edozein administraziok ere, hilabete izango dute desadostasuna Arbitraje Batzordera eramateko, zeinak gatazka konpondu beharko baitu, zergadunak dioena entzun ondoren, ekonomia-itun honetako 68. artikuluan aurreikusitako prozedura laburtua erabiliz.

Lau. Behin gatazka konpondu ondoren, edo konponbiderik ezean itun honetako 68. artikuluko Bi apartatuko epeak igaro eta Arbitraje Batzordeak erabakirik eman ez badu, horretan diharduen administrazioak jarduketeki ekiten jarrai dezake eta dagokion administrazio-egintzak eman ditzake; egintza horien ondorioak etenda geldituko dira Arbitraje Batzordeak ebazpena eman arte.

II. KAPITULUA FINANTZA-HARREMANEZ

1. ATALA ARAU OROKORRAK

48. artikulua. Printzipio nagusiak.

Estatuaren eta Euskadiren arteko finantza-harremanek ondoko abiaburuak izango dituzte:

Lehenengo. Euskadiko erakundeek euren eskumenak garatu eta erabiltzeko autonomia izango dute zergen eta finantzen eremuetan.

Bigarren. Elkartasunari eutsiko zaio, Konstituzioan eta Autonomia Estatuan ezarritako moduan.

Hirugarren. Aurrekontu-egonkortasunaren arloan Euskadiko erakundeak Estatuarekin koordinatuko dira eta berarekin lankidetzan arituko dira.

Laugarren. Autonomia Erkidegoak bere gain hartzen ez dituen Estatuaren zamak direla-eta, Euskadik ekarpena egingo du, ekonomi itun honetan zehaztu den eran.

Bostgarren. Toki erakundearen eremuan Estatuak une bakoitzean egikaritzen dituen finantza-tutoretzako ahalmenak Euskadiko erakunde eskudunei dagozkie; horrek ez du esan nahi, inola ere, Euskadiko toki erakundearen autonomia araubide erkidea duten toki erakundeena baino txikiagoa izango denik.

49. artikulua. Kupoak: kontzeptua.

Euskadik Estuari egindako ekarpena kupo orokor bat izango da, eta kupo hori lurralde historiko bakoitzari dagokionak osatuko du. Euskal Autonomia Erkidegoak bere egiten ez dituen Estatuaren kargei dagokien kontribuzioa da kupoak.

50. artikulua. Kupoaren aldizkakotasuna eta eguneratzea.

Bat. Bost urtean behin, Gorte Nagusietan bozkatutako legearen bidez, eta alde zuzenetik Ekonomi Itunaren Batzorde Mistoak akordioa lortu ondoren, bosturtekoan aginduko duen kupoak zehazteko metodologia zein izango den erabakitzeari ekingo zaio, ekonomi itun honetan jasotako printzipio orokorrekin bat. Era berean, bosturtekoaren lehenbiziko urteko kupoak ere onetsiko da.

Bi. Lehenbiziko urtearen ondorengo urte bakoitzean, Ekonomi Itunaren Batzorde Mistoak kupoak eguneratu egingo du, aurreko lehenbiziko aldizkakotasunaren legean onartutako metodologia aplikatuta.

Hiru. Kupoak zein izango den erabakitzeko metodologia bideratzen duten printzipioak — ekonomi itun honetan daude jasota — aldatu egin ahal izango dira Kupoari buruzko Legean, unean uneko egoerak eta hura aplikatzean izandako esperientziak hala egitea gomendatzen badute.

51. artikulua. Itundu gabeko zergak direla-eta izandako diru-sarreretatik Euskadiko toki-erakundeei eman beharrekoa

Itundu gabeko zergetan duten partaidetza dela-eta izan beharreko zeharkako ekarpenen kasuan, banaketako arau orokorren arabera banatu beharreko diru-kopuruak zabalduko dituzte foru aldundiek beren lurralde historikoetako toki-erakundeen artean.

2. ATALA KUPOA ZEHAZTEKO METODOLOGIA

52. artikulua. Autonomia Erkidegoak bereganatu ez dituen Estatuko kargak.

Bat. Autonomia Erkidegoak bereganatu ez dituen Estatuko kargak Autonomia Erkidegoaren esku benetan geratu ez diren eskumenei dagozkienak dira.

Bi. Karga horien zenbateko osoa zein den zehazteko, eragiketa hau egingo da: kasuan kasuko dekretuetan finkatutako transferentzien efektibitatearen egunetik Autonomia Erkidegoak bereganatutako eskumenei estatu mailan dagokien aurrekontuko zati osoa kenduko zaio Estatuaren aurrekontuko gastu osoari.

Hiru. Beste batzuen artean, hauek hartuko dira Autonomia Erkidegoak bereganatu gabeko kargatzat:

- a) Estatuaren Aurrekontu Orokorretan Lurraldearteko Konpentsazio Fondorako utzitako kopuruak (fondo hori Konstituzioaren 158.2. artikuluan aipatzen da). Karga hori dela-eta egin beharreko ekarpena Kupoari buruzko Legean zehaztutako bidearen arabera izango da.
- b) Estatuak izaki publikoentzako egindako transferentziak edo izaki horiei emandako dirulaguntzak, baldin eta izaki horiek dituzten eskumenak ez baditu Euskal Autonomia Erkidegoak bereganatu.
- c) Estatuaren zorren korrituak eta amortizazio-kuotak, Kupoari buruzko Legean zehaztutakoaren arabera.

Lau. Autonomia Erkidegoak bereganatu gabeko karga lurralde historikoen artean nola banatuko den jakiteko, hurrengo 57. artikuluan aipatzen diren indizeak erabili beharko dira.

53. artikulua. Balio Erantsiaren gaineko Zerga kontsumoari doitzea.

Bat. Balio Erantsiaren gaineko Zerga dela-eta lortzen diren sarreren egozketa hobetzeko asmoarekin, Euskadiko zerga-bilketarako ahalbidearen indizea eta kontsumo indizea elkarri doitzeko mekanismoa ezarri da.

Bi. Doikuntza hori eragiketa matematiko honen emaitza izango da:

$$RF_{PV} = RR_{PV} + a \cdot RR_{AD} + (a - b) \cdot H$$

Non:

$$H = RR_{PV}/b \text{ si } RR_{PV}/RR_{TC} \leq b/1 - b$$

$$H = RR_{TC}/1 - b \text{ si } RR_{PV}/RR_{TC} \geq b/1 - b$$

RF_{PV} = Urteko azken zerga-bilketa Euskadin.

RR_{PV} = Urteko benetako zerga-bilketa Euskadin.

RR_{TC} = Urteko benetako zerga-bilketa lurralde erkidean.

RR_{AD} = Urteko benetako zerga-bilketa inportazioak direla-eta.

a = Egoiliarren kontsumoa Euskadin/Egoiliarren kontsumoa Estatuan (Kanariak, Zeuta eta Melilla kontuan hartu gabe).

$$b = v - f - e + i / V - F - E + I$$

v = Euskadiko faktoreen kostuari erantsitako balio gordina.

V = Estatuako faktoreen kostuari erantsitako balio gordina (Kanariak, Zeuta eta Melilla kontuan hartu gabe).

f = kapital eraketa gordina Euskadin.

F = kapital eraketa gordina Estatuan (Kanariak, Zeuta eta Melilla kontuan hartu gabe).

e = esportazioak Euskadin.

E = esportazioak Estatuan (Kanariak, Zeuta eta Melilla kontuan hartu gabe).

i = Elkarte barruko ondasun-eskuraketak Euskadin.

I = Elkarte barruko ondasun-eskuraketak Estatuan (Kanariak, Zeuta eta Melilla kontuan hartu gabe).

Hiru. Kupoari buruzko Legean zehaztuko da, epealdi bakoitzerako, aurreko Bat idatz-zatian aipatu diren indizeen balioa.

Lau. Aurreko doikuntza behin-behinean egozteko eta hurrengo ekitaldian behin betiko erregularizatzeko, Ekonomi Itunaren Batzorde Mistoak onetsitako prozedura erabiliko da, hau da, une bakoitzean indarra duen prozedura.

54. artikulua. Fabrikazioaren gaineko Zerga Bereziak kontsumoari doitzea.

Bat. Alkoholaren eta Edari Eratorrien, Tarteko Ekoizkinen, Garagardoaren, Hidrokarburoen eta Tabako Moten Fabrikazioaren gaineko Zerga Bereziak direla-eta lortzen diren sarreraren egozketa hobetzeko asmoarekin, Euskadiko zerga-bilketarako ahalbidearen indizea eta kontsumo indizea elkarri doitzeko mekanismoa ezarri da.

Bi. Doikuntza hori eragiketa matematiko honen emaitza izango da, arestian aipatutako zergetariko bakoitzean:

$$RF_{PV} = RR_{PV} + c * RR_{AD} + (c - d) * H$$

Non:

$$H = RR_{PV}/d \text{ baldin eta } RR_{PV} / RR_{TC} \leq b/1 - d$$

$$H = RR_{TC}/1 - d \text{ baldin eta } RR_{PV} / RR_{TC} > b/1 - d$$

RF_{PV} = Urteko azken zerga-bilketa Euskadin, Alkoholaren, Edari Eratorrien eta Tarteko Ekoizkinen, edo Garagardoaren, edo Hidrokarburoen, edo Tabakoaren Fabrikazioaren gaineko Zerga Berezia dela-eta.

RR_{PV} = Urteko benetako zerga-bilketa Euskadin, Alkoholaren, Edari Eratorrien eta Tarteko Ekoizkinen, edo Garagardoaren, edo Hidrokarburoen, edo Tabakoaren Fabrikazioaren gaineko Zerga Berezia dela-eta.

RR_{TC} = Urteko benetako zerga-bilketa lurralde erkidean, Alkoholaren, Edari Eratorrien eta Tarteko Ekoizkinean, edo Garagardoaren, edo Hidrokarburoen, edo Tabakoaren Fabrikazioaren gaineko Zerga Berezia dela-eta.

RR_{AD} = Inportazioen ziozko urteko benetako zerga-bilketa, Alkoholaren, Edari Eratorrien eta Tarteko Ekoizkinean, edo Garagardoaren, edo Hidrokarburoen, edo Tabakoaren Fabrikazioaren gaineko Zerga Berezia dela-eta.

c = Egoiliarren kontsumoa Euskadin/Egoiliarren kontsumoa Estatuan (zergaren aplikazio eremua)

d = Zerga-bilketarako ahalbidea Euskadin/Zerga-bilketarako ahalbidea Estatuan (zergaren aplikazio-eremua)

Hiru. Kupoari buruzko Legean zehaztuko da, epealdi bakoitzerako, aurreko Bat idatz-zatian aipatu diren indizeen balioa.

Lau. Aurreko doikuntzak behin-behinean egozteko eta hurrengo ekitaldian behin betiko erregularizatzeko, Ekonomi Itunaren Batzorde Mistoak onetsitako prozedura erabiliko da, hau da, une bakoitzean indarra duen prozedura.

55. artikulua. Beste doikuntza batzuk.

Bat. Zeharkako zergapetzea hobetzeko, doikuntza egingo da, ekonomi itun honen 9.Bat.Lehenengoa.b) eta 7.Bi artikuluetan ageri diren balizkoak kontuan hartzen badira ateratzen diren kopuruak direla-eta.

Bi. Halaber, Kupoari buruzko Legean, behar izanez gero, beste doikuntza-mekanismo batzuk ezarri ahal izango dira, Euskadiri eta Estatuako gainerakoari egotzi beharreko sarrera publikoen zenbatespena hobetzeko.

Hiru. Bidezkoak diren doikuntzak eginda ateratzen diren kopuruak lurralde historikoen kupoak izango dira.

56. artikulua. Konpentsazioak.

Bat. Lurralde historiko bakoitzari dagokion kupotik, konpentsazio gisa ondorengo kontzeptuei dagozkien kenketak egingo dira:

- a) Itundu gabeko zergen zati egozgarria.
- b) Izaera ez tributarioa duten aurrekontuko diru-sarreraren zati egozgarria.
- c) Estatuaren Aurrekontu Orokorrek izango duten defizitaren zati egozgarria, Kupoari buruzko Legean zehaztuko den moduan. Superabita izanez gero, justu kontrako moduan jardungo da.

Bi. Halaber, lurralde historikoen kupoei kenduko zaio, konpentsazio gisa, sarrera batzuen zati bat, alegia, osasunaren eta Gizarte Segurantzako gizarte-zerbitzuen arloetan Euskadiri insuldatu zaizkion eginkizun eta zerbitzuak finantzatzeko diren sarreretatik Euskadiri egotzi behar zaion zatia. Sarrera horiek, lege hau indarrean jarri aurretik, Euskadiri ordaindu izan zaizkio Gizarte Segurantzako Diruzaintza Nagusiaren transferentzien bitartez, azaroaren 6ko 1.536/1987, urriaren 2ko 1.476/1987, abuztuaren 23ko 1.946/1996 eta apirilaren 2ko 558/1998 errege dekretuetan araupetutako aurrekontu-araubidea aplikaturik.

Hiru. Aurreko zenbakietan aipatu diren kontzeptuak egozteko, hurrengo 57. artikuluan ezarritako indizeak erabiliko dira.

57. artikulua. Egozpen-indizeak.

Bat. Aurreko 52, 55.Bi eta 56. artikuluetan aipatzen diren egozpenak egiteko indizeak lurralde historikoetako errenta kontuan izanda zehaztuko dira batez ere.

Bi. Indize horiek Kupoari buruzko Legean zehaztuko dira eta lege hori indarrean dagoen artean aplikatuko dira.

58. artikulua. Bereganatutako eskumenak aldatzeak behin-behineko kupoan duen eragina.

Bat. Kupoa, aurreko araudiaren arabera zehaztuta, urtero indarrean dagoen bitartean Euskal Autonomia Erkidegoak eskumenen bat bereganatu badu, eta eskumen horren estatu mailako urteroko kostua Kupoaren behin-behineko kopurua zenbatekoa izango zen jakiteko erabili ziren Estatuaren kargen barruan sartuta baldin bazegoen, urteroko kostu hori murriztu egingo da, Euskadik aginpide horiek bereganatu dituen urteko unearen proportzioaren arabera. Era berean, eta aurrekoaren ondorioz, kupo ere murriztu egingo da kasuan kasuko kopuruan.

Aipatu den murrizte proportzional horrek gastu arruntak benetan zenbatean behin sortzen diren kontuan izango du, eta baita Estatuaren inbertsioak benetan zenbateraino burutzen diren.

Bi. Modu berean jardungo da Autonomia Erkidegoak behin-behineko kupoaren zenbatekoa zehazteko orduan zituen eskumenen batzuk erabiltzeari uzten badio. Hala gertatuko balitz, kupo bidezkoa den beste handituko litzateke.

59. artikulua. Behin-behineko eta behin betiko likidazioak.

Hasieran eta behin-behingo kupo eta bidezkoak diren konpentsazioak zenbatekoak izango diren zehazteko, Estatuaren aurrekontuko kopuruak hartuko dira kontuan, kasuan kasuko urterako onetsitako aurrekontuak.

Ekitaldia amaitu ondoren eta Estatuaren aurrekontuen likidazioa egin ostean, egin beharreko zuzenketa guztiak egingo dira ekonomi itun honetako 52, 55 eta 56. artikuluetan aipatzen diren magnitudeetan.

Zuzenketa horien ondorioz alde edo kontra izango diren ezberdintasunak ezberdintasun horiek gauzatu diren urtearen hurrengo urteko behin-behineko kupoan gehituko dira algebraikoki.

60. artikulua. Kupo ordaintzea.

Euskal Autonomia Erkidegoak ordaindu beharreko kopurua hiru epe berdinetan abonatu zaio Estatu Ogasun Publikoari. Urtero, maiatzean, irailean eta abenduan izango da hori.

III. KAPITULUA EKONOMI ITUNAREN BATZORDEEZ ETA ARBITRAJE BATZORDEAZ

1. ATALA EKONOMI ITUNAREN BATZORDE MISTOA

61. artikulua. Kideak eta erabakia.

Ekonomi Itunaren Batzorde Misto honela egongo da osatuta: batetik, foru aldundietako ordezkari bana eta Eusko Jaurlaritzako hiru ordezkari; bestetik, Estatuko administrazioetik aurreko guztiak beste ordezkari egongo dira.

Ekonomi Itunaren Batzorde Mistoak erabakiak hartu ahal izateko, batzordekide guztiek aho batez baietza eman behar dute.

62. artikulua. Eginkizunak.

Ekonomi Itunaren Batzorde Mistoak eginkizun hauek izango ditu:

- a) Ekonomi Itunaren aldarazpenak erabakitzea.
- b) Aurrekontu-egonkortasunaren arloko lankidetzak eta koordinazioari buruzko konpromisoak erabakitzea.
- c) Bosturteko bakoitzean kupoa ezartzeko metodologia erabakitzea.
- d) Kapitulu honetako 3. atalean araututako Arbitraje Batzordeko kideen izendapena eta araubidea erabakitzea, eta bai Batzordearen jardunbideari, biltzeko deialdiei, bilerei eta erabakiak hartzeko araubideari dagokiena ere.
- e) Zerga eta finantza gaiei buruz une bakoitzean hartu beharreko erabakiak hartzea, itun honetan ezarritakoa behar bezala aplikatu eta garatu dadin.

2. ATALA ARAUGINTZA KOORDINATU ETA EBALUATZEKO BATZORDEA

63. artikulua. Kideak.

Araugintza Koordinatu eta Ebaluatzeiko Batzordea era honetan egongo da osatuta:

- a) Estatuko Administrazioaren lau ordezkari.
- b) Autonomia Erkidegoaren lau ordezkari, Eusko Jaurlaritzak izendatutakoak; lau horietatik hiru foru aldundiek proposatuko dituzte, bakoitzak bana.

64. artikulua. Araugintza koordinatu eta ebaluatzeiko Batzordeak eginkizun hauek izango ditu.

Araugintza koordinatu eta ebaluatzeiko Batzordeak eginkizun hauek izango ditu:

- a) Zergen arloko arauak Ekonomikoa Itunari egokitzen zaizkion aztertzea horiek argitaratu aurretik.

Hori dela-eta, ekonomia-itun honen 4. artikuluko Bat apartatuan azaldu den bezala administrazioek euren araugintza-proiektuak elkarri erakusten dizkietenean, proiektuotan jasotako proposamenak direla-eta inork oharren bat egiten badu, Batzordean ordezkariak dituzten erakunde eta administrazioetariko edozeinek, idatziz eta zioak azalduz, Batzordearen bilerarako deialdia egin dadila eskatu ahal izango du. Deialdia egiteko eskatzen den egunetik hasita, Batzordeak 15 eguneko epean egin behar du bilera, proposatutako araudia Ekonomia Itunekoarekin bat datorren aztertzeko, eta ahaleginak egingo ditu, araua argitaratu baino lehen, bertan ordezkariak dauden erakunde eta administrazio guztiek tributu-araudiaren edukiaren inguruan desadostasunik badago akordioa lor dezaten.

- b) Ekonomia-itun honetan aipatutako lotura-puntuen aplikazioari buruz egiten zaizkion kontsulterei erantzutea. Kontsulteraren bat jasotzen denean, bi hilabeteko epean hura jaso denetik, kontsulta bera eta beraren ebazpenerako proposamena gainerako administrazio interesdunei helaraziko zaizkie, azter ditzaten. Inork ez badu oharririk egiten ebazpen-proposamenari buruz, beste bi hilabete igarotakoan, proposamena onetsizat joko da.

Oharririk badago eta horiek onartu ezean, horien gaineko akordioa lortu ahalko dute Araugintza Koordinatu eta Ebaluatzeiko Batzordearen barruan. Nolanahi ere, aipatutako oharrak egin eta bi hilabetera ez bada akordiorik lortu, Araugintza koordinatu eta ebaluatzeiko Batzordeak, baita tartean dagoen beste edozein administrazio ere, hilabete izango du desadostasuna Arbitraje Batzordera eramateko.

- c) Aurreko 47 ter artikuluko gaien inguruan planteatzen diren oharren gainean ebazpena ematea.
- d) Egoki deritzon azterlanak egitea araubide autonomikoa eta Estatuko marko fiskala egokiro uztartzeko, egituraren eta eginkizunen aldetik.
- e) Administrazio eskudunei euren jardunak elkarri egokitzeko irizpideak, planak eta informatikako programak eskaintzea, eta lankidetzaren eta informazio-trukearen printzipioa benetan gauzatu dadin erabili behar diren tresnak, bitartekoak, prozedurak edo metodoak artikulatzea eta erabakitzea.
- f) Ikuskapen-gaietan Estatuko Administrazioaren eta foru-aldundien artean sortutako auziak edo arazoak aztertzea, baita tributuen ondoreetarako egindako balorazioen inguruko arazoak ere.
- g) Txostenak egitea Ogasun Ministerioarentzat, Eusko Jurlaritzako eta foru-aldundietako ogasun-sailentzat eta Arbitraje Batzordearentzat, haiek eskatuz gero.
- h) Ekonomia-itun hau aplikatu eta betearaztearekin zerikusia duten beste eginkizun guztiak.

3. ATALA ARBITRAJE BATZORDEA

65. artikulua. Kideak.

Bat. Arbitraje Batzordeak hiru kide izango ditu. Haien izendapena Ogasun Ministroak eta Ogasun eta Herri Administrazio sailburuak formalizatuko dute.

Bi. Kide horiek sei urterako izendatuko dira.

Hiru. Karguren bat hutsik geratzen denean, izendapenerako prozedura bera erabiliko da hura betetzeko.

Kargua utzi duen kideari agintaldia amaitzeko geratzen zaion denborarako izendatuko da haren ordezkari kide berria.

Lau. Arbitraje Batzordeko kideak itzal handiko adituak izan behar dira, tributuen edo ogasunaren arloan lanbidez aritutakoak hamabost urtean, gutxienez.

66. artikulua. Eginkizunak.

Bat. Arbitraje Batzordeak eginkizun hauek izango ditu:

- a) Estatuko Administrazioaren eta foru-aldundien artean edo hauen eta beste autonomia erkidegoetako administrazioen artean sortzen diren auziak ebaztea, bai tributu itunduen lotura-puntuari aplikazioari dagokionez, bai administrazio bakoitzari zenbateko zatia dagokion zehazteko, Sozietateen gaineko Zerga edota Balio Erantsiaren gaineko Zerga administrazio bati baino gehiagori ordaindu behar zaionean.
- b) Banako tributu-harremanetako arazo zehatzetan ekonomia- itun hau interpretatzeko eta aplikatzeko orduan administrazio interesatuen artean sor litezkeen auziak erabakitzea.
- c) Zergadunen egoitza dela-eta sor litezkeen desadostasunak ebaztea.

Bi. Eskumenak direla-eta gatazkaren bat sortzen denean, ukitutako administrazioek interesatuei jakinaraziko diete; horrenbestez preskripzio-epea eten egingo da eta hortik aurrera administrazio horiek ez dute inongo jarduketarik egingo.

Gatazkak ebazteko prozedura arau bidez ezarriko da. Prozedura horretan interesatuei entzun egingo zaie.

Hiru. Eskumenak direla-eta gatazkaren bat sortzen denean, harik eta hura ebatzi arte, gatazka horren xede diren zergadunak zergapetzen zituen Administrazioak bere eskumenaren mende atxikiko ditu zergadunok; nolahi ere, Arbitraje Batzordeak erabakitakoa ikusita, tributuen arloko zuzenketak eta konpentsazioak egin ahal izango dira, tributuen arloko foru berria betearazi behar den egunera arteko atzeraeraginarekin.

67. artikulua. Arbitraje Batzordearen erabakiak.

Arbitraje Batzordeak Zuzenbidearen arabera ebatziko ditu espediente bakoitzak agerian jartzen dituen auzi guztiak, exekuzio formulak barne direla, berdin da auzi horiek gatazkako alderdiek edo interesatuek aurkeztutakoak izan edo ez, eta ebazpenetan ekonomia, arintasun eta erginkortasun printzipioen arabera jardungo du.

Arbitraje Batzorde horrek hartutako erabakiak betetze-indarrekoak izango badira ere, administrazio-auzigaletako errekurtsua (besterik ez) aurkeztu ahal izango da Auzitegi Goreneko arlo horretako salan.

68. artikulua. Prozedura bereziak.

Bat. Hauek dira ekonomia-itun honetan aurreikusitako Arbitraje Batzordearen prozedura bereziak: prozedura laburtua, efektuak zabaltzea eta betearazpen-intzidentea.

Bi. Prozedura laburtua aplikatuko da ekonomia-itun honetako 64. artikuluko b) letrako eta 47.ter artikuluko Hiru apartatuko kasuetan.

Kasu horietan, auziak hilabeteko epean onartuko beharko ditu izapidetzeko Arbitraje Batzordeak, aurkezten direnetik zenbatzen hasita; hamar eguneko epe komuna emango die ukitutako alderdi guztiei alegazioak egin ditzaten, eta epe hori bukatu eta hilabetean eman beharko du ebazpena.

Hiru. Baldin eta norbaitek auzi bat aurkezten badu ekonomia-itun honetan aurreikusitako Arbitraje Batzordean, eta auzi horren muinean dagoen kasuaren oinarria jada ebatzita badago beste auziren batean Arbitraje Batzordeak emandako ebazpen irmo batez, eskatu ahal izango du auzia ebatz dadila ebazpen irmo horren efektuak zabalduaz.

Ondorio horietarako, eskabide-idazkia hilabeteko epean aurkeztu beharko da, Arbitraje Batzordearen ebazpenaren irmotasuna jakiten denetik zenbatuta. Arbitraje Batzordeak gainerako alderdi interesdunei jakinaraziko die idazkia, hamar eguneko epean kasuen oinarriari buruzko alegazioak egin ditzaten, eta ebatzi beharko du ebazpen irmoaren efektuak zabaltzen dituen edo arau orokorre jarraituz arbitraje-prozedurak hilabetez aurrera jarraituko duen.

Lau. Betearazpen-intzidentearen bidez, ekonomia-itun honetan aurreikusitako Arbitraje Batzordearen prozedura batean parte izan denak Arbitraje Batzordearen ebazpena betearazteko neurriak eskatu ahalko ditu baldin eta ukitutako administrazioak ez badu ebazpena bere horretan betearazi.

Betearazpen-intzidenteen gainean Arbitraje Batzordeak hartzen dituen erabakietan, ekonomia-itun honetako 67. artikuluan xedatutakoa aplikatuko da.

XEDAPEN GEHIGARRIAK

Lehen xedapen gehigarria.

Lurralde historikoetan eskumena duten erakundeek ekonomi itun hau aplikatzeko beharrezkoak diren xedapenak ematen ez dituzten artean, araubide lurralde erkidean indarrean dauden arauak aplikatuko dira. Arau horiek, dena dela, zuzenbide osagarri izango dira beti.

Bigarren xedapen gehigarria.

Bat. Hitzarmen honetan aldaketaren bat egin behar bada, hitzarmena indarrean jartzeko erabilitako bide bera jarraitu beharko da.

Bi. Estatuak zergei buruz duen antolamendu juridikoan berrikuntza nabarmenen bat gertatuko balitz eta berrikuntza horrek zergen itunketari eragingo balio, edo araugintzarako eskumenen banaketa aldatuko balitz eta aldaketak zeharkako zergapetzearen eremuari eragingo balio, edo zerga-figura edo konturako ordainketa berriren bat sortuko balitz, bi administrazioek, ados jarrita, ekonomi itun hau antolamendu horretan izandako aldaketetara egokituko lukete.

Inoiz ekonomi ituna era horretara egokitzen bada, egokitzapenaren finantza-ondoreak zehatz azaldu beharko dira.

Hirugarren xedapen gehigarria.

Araba, Gipuzkoa eta Bizkaiko foru aldundiek 1906ko abenduaren 13ko Errege Dekretuaren 15. artikuluan onartu zitzaizkien ekonomia eta administrazio arloko ahalmenak izango dituzte, Konstituzioaren lehenengo xedapen gehigarrian aurreikusten den foru araubidea osorik eguneratzeko prozesua dela-eta indarrean baldin badaude. Dena dela, kontuan izan beharko dira Konstituzioaren 149.1.18. artikuluan aipatzen diren oinarriak ere.

Laugarren xedapen gehigarria.

Euskadin egin beharreko inbertsio batzuk elkarrekin finantzatzea erabaki dezakete Estatuak eta Euskal Autonomia Erkidegoak, era horretan jardutea komenigarria dela erakusten badute hainbat arrazoik: inbertsioaren zenbatekoak, balio estrategikoak, interes orokorrak, Euskal Autonomia Erkidegoaz kanpoko beste lurralde batzuei ere eragiteak, edo beste arrazoi berezi batzuk egoteak.

Era berean, Euskadiko lurraldeaz kanpoko beste leku batzuetan egin beharreko inbertsioetan Euskadik parte hartzea ere erabaki dezakete Estatuak eta Euskal Autonomia Erkidegoak, aurreko lerroaldean aipatzen diren arrazoi berak gertatzen badira.

Egoera batean zein bestean, diru-ekarpen horiek kupoan izango duten eragina kasu bakoitzean hitzartuko dena izango da.

Bosgarren xedapen gehigarria.

...

Seigarren xedapen gehigarria.

Ekonomi itun honen 14, 15, 19 eta 27. artikuluetan aipatutako eragiketa-kopurua bost urtean behin edo sarriago eguneratuko da, Ekonomi Itunaren Batzorde Mistoak beren beregi hartuko dituen erabakien bidez.

XEDAPEN IRAGANKORRAK

Lehen xedapen iragankorra.

Itun honetako 14., 15. 19. eta 29.6 artikuluetan txertatu diren aldaketak aplikatuko dira Ekonomia Itunaren Batzorde Mistoaren 2017ko uztailaren 19ko Erabakiaren bitartez onartutako itunaren aldaketa onartzen duen Legea indarrean jartzen denetik aurrera hasten diren zerga-ekitaldietan edo likidazio-aldietan, zein eratako zerga den.

Era berean, ekonomia-itun honetako 29.9 eta 47.ter artikuluetan xedatutakoa aplikatuko da Ekonomia Itunaren Batzorde Mistoaren 2017ko uztailaren 19ko Erabakiaren bitartez onartutako

itunaren aldaketa onartzen duen Legea indarrean jartzen denetik aurrera hasten diren zerga-ekitaldiei soil-soilik dagozkien erregularizazioetan.

Bigarren xedapen iragankorra.

Ekonomi itun hau indarrean jarri baino lehen sortzapena izan duten zergak direla-eta, manuzkoak izango dira horien sortzapenaren unean indarrean egon ziren lotura-puntuak.

Arau bera erabiliko da atxikipenekin, konturako sarrerekin eta zatikako ordainketekin ere, atxikipena, konturako sarrera edo zatikako ordainketa egin beharra ekonomi itun hau indarrean jarri aurretik sortua den kasuetan.

Ekonomi itun hau indarrean jartzen denean burutu gabe egongo diren prozeduretan manuzkoa izango da eurak hasi zirenean indarrean zegoen arautegia.

Hirugarren xedapen iragankorra.

Aurreko xedapen iragankorrean esandakoa gorabehera, ekonomi itun honen III. kapituluaren aipatu diren organoek ezagutuko dituzte, honako honetan ezarri zaizkien prozeduren eta eskumenen arabera, ekonomi itun hau indarrean jartzen denean bi administrazioek konpondu gabe izan litzaketen auzi guztiak.

Laugarren xedapen iragankorra.

Ogasun Ministerioaren eta Arabako Foru Aldundiaren ordezkariak osatutako Batzorde Misto Parekatuak zehaztuko du zenbateko konpentsazioa hartu behar duen foru aldundi horrek Euskal Autonomia Erkidegoak bereganatu gabeko eskumenak garatzen eta zerbitzuak egiten diharduen bitartean, araubide erkideko probintzietan Estatuak egiten baititu lan horiek. Halaber, batzorde mistoak arauak ezarriko ditu konpentsazio hori urtero berrikus dadin, Euskal Autonomia Erkidegoari eskumenak transferitzeko egutegian oinarrituta.

Kompentsazioa zehaztu eta aplikatuko bada ere, horrek ez du eraginik izango kupoa zehazteari buruz itun honetan ezarri diren arauetan. Kompentsazioa, nolahi ere, Autonomia Estatutuaren 41. artikuluko Bi idatz-zatiko e) letraren arabera Arabari dagozkion kupoen zenbatekoak murriztuz gauzatuko da.

Bosgarren xedapen iragankorra.

Ekonomi itun hau indarrean jarri aurretik eratutako ekonomi intereseko elkartzei eta enpresen aldi baterako batasunei aplikatu beharreko zerga-araubidea Euskadiri dagokiona bera izango da, baldin eta elkartze eta batasun horiek Euskadiko lurralde-eremua gairatzen ez badute.

Seigarren xedapen iragankorra.

...

Zazpigarren xedapen iragankorra.

Harik eta Tabako Moten fabrikazioaren eta salerosketaren egungo araubidea aldatu arte, Tabako Moten Fabrikazioaren gaineko Zerga berezia dela-eta egin behar den doikuntza, ekonomi itun honen 54. artikuluan dagoena, hain zuzen ere, eragiketa matematiko honen bidez kalkulatu da:

$$RF_{PV} = RR_{PV} + c' * RR_{TC} [(1-c') * RR_{PV}]$$

Non:

RF_{PV} = Urteko azken zerga-bilketa Euskadin, Tabako Motak direla-eta.

RR_{PV} = Urteko benetako zerga-bilketa Euskadin, Tabako Motak direla-eta.

RR_{TC} = Urteko benetako zerga-bilketa lurralde erkidean, Tabako Motak direla-eta.

c' = Euskadiko tabako eta tinbre saltokiei emandako tabako-gaiak/Zergaren aplikazio lurraldeko tabako eta tinbre saltokiei emandako tabako-gaiak.

Zortzigarren xedapen iragankorra.

Hidrokarburoen gaineko zergaren itzulketa partziala dagokion Administrazioak egingo du itzulketa horien onuradunaren zerga-egoitzara. Itzulketa izango da xede profesionalarekin erabilitako gasolioari murriztutako tasa berezia ezartzetik eratorritakoa. Murriztutako tasa berezi hori ezartzea baimentzen du honako honek: Kontseiluaren 93/1996/CE zuzentaraua, 2003ko urriaren 27koa, energia- eta elektrizitate-produktuen zergapetze-erregimen komunitarioa berregituratzeko dena.

Bederatzigarren xedapen iragankorra.

Abeltzain eta nekazarietzako hidrokarburoen gaineko zergaren ezohiko itzulketak, nekazaritzaren sektoreko produkzioan inputaren kostu-hazkundera leuntzeko neurriak aplikatetik eratorritakoak, dagokion Administrazioak egingo ditu itzulketa horien onuradunaren zerga-egoitzara.

Hamargarren xedapen iragankorra.

...

Hamaikagarren xedapen iragankorra.

Itundutako tributu berrien araubide iragankorrak 2013ko urtarrilaren 1etik izango ditu ondorioak, honako erregela hauen arabera:

Lehenengo. Lurralde historikoak, zergen arloan, Estatuko Ogasun Publikoak dituen eskubide eta betebeharrak guztiak subrogatuko dituzte, xedapen honetan jasotzen diren tributuen kudeaketa, ikuskapen, berrikuspen eta bilketari dagokionez.

Bigarren. Xedapen honetan jasotzen diren tributuen itunduta egonez gero Euskal Autonomia Erkidegoan lotuta egongo ziratekeen egoerak direla-eta 2013ko urtarrilaren 1a baino lehen likidatutako eta hartutako zenbatekoak foru-aldundiei dagozkien oso-osorik, baldin eta 2013ko urtarrilaren 1aren ondoren ordaintzen badira.

Hirugarren. 2013ko urtarrilaren 1a baino lehen sortu eta ikuskapen-jarduketan ondorioz data horretatik aurrera likidatutako zenbatekoak banatzeko, xedapen honetan jasotzen diren tributuen irizpideak eta konexiopuntuak aplikatuko dira.

Laugarren. Hala dagokionean, 2013ko urtarrilaren 1a baino lehen egin diren edo egin beharko ziratekeen likidazioei dagozkien itzulketak sortzapen- unean eskuduna den administrazioak egin beharko ditu, xedapen honetan jasotzen diren tributuen irizpideen eta konexio-puntuen arabera.

Bostgarren. Lurralde historikoetako erakunde eskudunek emandako administrazio- egintzak bide ekonomiko-administratiboan erreklamatu ahal izango dira, lurralde horietako organo eskudunen aurrean. Estatuko Administrazioak emandakoak, aldiz, Estatuko organo eskudunen aurrean erreklamatu ahal izango dira, egintza horiek eman ziren data edozein dela ere.

Dena dela, egintza horri dagokion sarrera aurreko erregeletan jasotako arauen arabera hartzekoduna den Administrazioari esleituko zaio.

Seigarren. Zergen arloko arau-hausteak eta haiei legozkiekeen zehapenak kalifikatzeari dagokionez, balio eta eraginkortasun osoa edukiko dute xedapen honetan aipatzen diren zergen ituntzea indarrean jarri aurretik gai horri buruz Estatuko Ogasun Publikoan jasota zeuden aurrekariak.

Zazpigarren. Xedapen honetan aipatzen diren tributuen ituntzea indarrean jartzeak ez die kalterik eragingo zergadunek data horren aurretik emandako legeen ondorioz eskuratutako eskubideei.

Hamabigarren xedapen iragankorra.

Kirol eta ongintzako elkarrekiko apustuak eta estatuko elkarrekiko zaldi-apustuak kargatzen dituen Joko-jardueren gaineko Zergaren ordainarazpena Estatuko Administrazioari dagokio, baldin eta apustuok Estatuko Loteria eta Apustuen Estatu Sozietateak merkaturatzen baditu, Euskal Autonomia Erkidegoari egin beharreko finantza-konpentsazioaren kalterik gabe. Estatuko Loteria eta Apustuen Estatu Sozietateak aitorten informatiboak aurkeztuko ditu, urtero, non Ekonomia Itunaren 36.Bi artikuluekin bat estatuan jokaturako zenbatekoetatik Euskal Autonomia Erkidegoari egoztekoak diren kopuruak jasoko baitira.

Hamahirugarren xedapen iragankorra.

Ekonomia Itunaren 34. artikulua, Euskal Autonomia Erkidegoarekiko Ekonomia Ituna onartu zuen 2002ko maiatzaren 23ko 12/2002 Legeak emandako idazketan, indarrean mantenduko da 2013ko urtarrilaren 1etik aurrera, Zenbait Hidrokarburoren Txikizkako Salmenten gaineko Zergari dagokionez, data horretan preskribitu gabe dauden ekitaldietarako.

AZKEN XEDAPENA

Azken xedapen bakarra

Zergei aplikatu behar zaizkien Ekonomia Ituneko arauak indargabetu edo aldatzeko aukera badago ere, horrek ez du aldaraziko administrazioek duten eskubidea lehenago sortutako zorrak aurretik zeuden lotura-puntuen arabera eskatzeko.